

ri Dieng

(K. K. Kharlukhi)

Ki Nongialehkai :-

1. U Donkin.
2. Ka Deiti, ka puri dieng.
3. U Kron. u khynnah trei jong u Donkin.
4. U Nisor, u nongkhaji - dieng.
5. U Kyrmen, u paralok u Donkin.
6. Kiwei kiwei.



ACT-I

(Plie ka Pyrda. Sdang ka surjingtem).

Ha 'lawkynjah. Uwei u dieng uba heh u don hapteng rynsan. Kiwei kiwei ki dieng, ki bniap bad ki syn-tiew khlaw ki don ha ka liang ka-diang jong ka rynsan. Ha ka liang kamon, ki don ki mawbyнна bad ka mawkynthei.

(Kut ka surjingtem. Wan mih u Donkin bad u leit shong puson ha ki mawbyнна).

Donkin : Ani ! ki sngi ki snem ki iaid stet thir - thir, ka juk ka la kylla. Shiphew snem mynshuwa, uei u ban poi pyrkbhat ban wan poi sah shane sha 'lawbah 'lawsan kumne ? Hynrei katto ba nga la ngiah shoin ia ka khynwin ka kynkaw ka sor, ngam lah pat hangne khlem da sngew kynjah sngew tmang. Lymda dei ba don ki jyari jyndub, ka kper ka phrah, lymda dei ba don sa u Kron te la pah niangkynjah sa ki shkor. Tangba uto u khynnah, u Kron, uba bun ktien palat phi, u lah ban kren baroh shi sngi khlem sangeh, uba

nang bha ban biria bad ka kb!ieh
 ruh uba don, nga mut uba stad shi-
 sha wat la u khlem iohlad ban pyn-
 dep ia ki jingpule. Tangba un da
 bun ktien makna kumto, donbok pat
 ba u smat u sting ka kti ka kjat,
 ki kam bad u shaid - shaid ki dep,
 kim ju sahteng.

Kron : (Na sha lyndet) Bah Don, ko Bah
 Don, shano phi don ?

Donkin : Sngap shata, uta u la wan, um ju
 ai shongthait ia nga tang shikhyl-
 lipmat ruh

Kron : (Wan rung) O ! ine du i Bah hang-
 ne ! Shi phi Bah, ia phi te mo, la
 dei ban tap lubri noh phi Bah ia ka
 kyrteng jong phi. Phim ju don te
 Bah Don.

Donkin : Mame te mo, uba lapmiet sa tang
 ka nia kai, sa tang ka biria.

Kron : Phi ong nga biria ? Ngan iathuh ia
 phi Bah, ka biria ka dei ki um jer
 ksiar umjer rupa ia ka jingmut jing-
 pyrkhat, ka syrpad syrpaia ia ki thied
 janor, ka ai jingkmien ia ka mynsiem
 bad ka pynum ia ka dohnud.

Donkin : Kren mame te mo, sngew kumba
 nga uba shu khulai sah ka mynsiem....

Kron : Ym dei tang ba phi khulai, Bah, hynrei phi da tmang de. Nga la sah katta bad phi, phi tharai ngam fithuh ia ki dak.

Donkin : Ki dak aiu ?

Kron : Wa, i Bah ! Hato ngam la ju iohi ia phi ba phi ia d sharum, phi iaid shaneng, phi khiih shane, phi khiih shatai. Phi mut ngam ju iohi ia phi ba phi ju shong shan tmoh marwei bad peit khangkhai ia ka dongdit kumba phi ap iano - re ne wad ia kaei - re kaba duna ha ka jingim jong phi.

Donkin : Ade, la kren tip - phang i Bah Kron. Kaei mo Bah Kron kata kaba duna ha ka jingim jong nga ?

Kron : Wa ! sa ia kata ruh, phim la sngew thuh bi haogta ? Phi tharai phin da wan phai sha iing janmiet phim ju mutdur ban don ba ap lypa ia phi ha iing, ban pynrhem lypa ka ding ka theh, ban pynsyaid lypa ka ja ka jyntah ?

Donkin : O, balei ? mame mem ju leh kumta ia nga ?

Kron : Kaba leh ma nga bad kaba leh ita pat iba dei ban leh ia kita, ka pher phi

i, Bah. Bad sa kawei pat phi mut ba phi tang shu wan phai sha iing phin da peit thik mo ia kata ka ding ha rympei? Hato ki khmat jorg phi kin ym shat nyngkong eh sha ki rymmiang kiba ryum, u shniuh uba rymphai bad ki ngab kiba saw huin?

Donkin : Kein noh me, iakren bad me poi pynban sha khlaw.

Kron : O! phi mut ngi don haei ko Bah mynta?

Donkin : Kein noh katto nga ong...ia noh....
O, ap shuwa! nga kwah ban kylli me wan leh aiu shane?

Kron : Nga wan wad ia phi kein Bah. Nadesh hynre phi la shu jah kumto na iing, nga ong halade, 'i Bah katta im wan phai shuh, i la ngat puri pynban mo ade!

Donkin : Sngap shata, u la poi pat sa sha ki puri?

Kron : O, balei Bah? Phi mut kim don?

Donkin : Mynshuwa te ki lah ban don kein me, hynrei ha kane ka juk mynta, tang ba ia kynkaw ki briew, tang

ba sawa ki kali, mih sa ki iing, jah
lut ki khlaw ki btap, kam la ia iap
jynduh jyndam lut ko lih?

Kron: Shisba phi Bah, phi tharai ki puri
ki ju iap?

Donkin: Tip mo ong! ynda tip sa ia kata
baroh te me....tangta long kumta
kein me, lada kam ia iap ruh, to
pyrkhat hi mame kein, hangno shuh
kan iashong iasah?

Kron: Ioh ka shu ia don kein Bah, ka lah
ban iashong ha ki maw ki dieng, ki
um ki wah. Wa! mano ba lah ban
tip ioh ka ia don wat hangne ha
khlaw jong phi ruh jait ba dang
bun ka dieng ka siej kumne.

Donkin: Kein noh me....me uba shu kwah ban
ngeit jubor ha kita ki puri ki diaw,
ki basa ki dken, ki suidlum suidwah.
Peit shane Kron, kane ka dei ka juk
Computer, ka juk Satellite, ka juk
Nuclear, ki puri ki diaw ki dei ki
jong ka mynnor, kim don shuh
mynta.

Kron: Ka dei kaba phi ong hynrei hangne
ha khlaw te Bah yn ia komputer,
yn ia niwkliar shano phi. Ka khlaw
te ka khlaw seh, katba ym pat bthei
uta u bom niwkliar, katba ym pat

ktah hi ka met, kum ban shu ong
noh, yn leit ia tip shano ba don kita

Donkin : Me te uba la nang pynksan la ka
nja. To me, kein noh katto, ia ngin
ia leit noh, ka la dei ka por ai bam
ia ki smang ki syiar.

(Mih ka jingsawa kumba kyan bad
ud sur kynthei bad ka jah noh).

Kron : Sngap Bah, phi iohsngew ?

Donkin : Iohsngew ia kaei ?

Kron : Sngew kumba don ka kynthei kaba
ud shane shajan.

Donkin : Me la khlehbieit ne ? Ka kynthei
alu kata ka ban wan kai shane sha-
pdeng khlaw khlem kam khlem jam.
Ale noh.

Kran : Are ! nga sngew shisha kum ka sur
kynthei. La bakla ki shkor jong nga,
imat. Ia, ia kata....

(Mih u Donkin bad u Kron).

(Ka Deiti ka wan mih na lyndet u
dieng sha ryusan. Ka phai shane
shatai, kam iohi iano - iano ruh. Ka
fald shakhmat, ka shad tawiar, ka
syrpud ia ki baiap bad kheit ia u

tiewkhlaw bad sma ia u. Nangta ka ring pynhiar mynsiem jur bad ia id biang shakmat da ka dur khmat kaba rymmuin).

(U Kron u phngoid ka khlieh na ka liang karnon jong ka rynsan, u iohi ia ka Deiti bad u leit rieh ba lyndet jong ki mawbynra. Nangta, u khawwoit kti bad u Donkin ruh u wan rieh lem hajan u Kron. Ki ia peit sani bha ia ka baroh arngut. Ha khatdub, u Donkin u mih bluit hakmat ka Deiti. Ka Deiti ka kyn-dit thred, ka mut ban phet hynrei ka ur ha tbian. Ka ieng biang bad u Donkin u tur sha ka).

Donkin : Thei, Thei ... wat leit sheptieng.

(Ka Deiti ka iapler jlang da ka jing-tieng, ka thap shoh kyllon bad u Donkin u kynrup bad bat ia ka ha la kti).

Kron, Kron, ale kloi ... peit me ka la iapler, ngin ialeh kumno ?

Kron : Synreit da ka um Bah, synreit da ka um.

Donkin : Yn ioh um naei me hangne ?

Kroh : O, shisha ! ap, ngan leit march ma nga, ngan leit tong na katai ka

wahduid hangtai.

Donkin : Wat ju kren bieit, men tong daei ?

Kron : O, la iap ! ngin ialeh kumno ? Em, kane te la bha ban rah ia ka sha iing. Ap Bah, ngan leit pynkhreh ma nga, ngan lum ngan lang ia ka iing malu mala.

Donkin : Khie, khie ... (Mih u Kron). Ka wan mih naei kane ka briew ? Ani, ka jingbhabriew ! Khmih ! katno ki ngab jong ka ki phuh, ka sniehdoh kaba jlih, u shniuh uba rymphai. Kumno ka poi hangne hapdeng khlaw marwei kumne ? Khlem pep kan dei ka khynnah sor .. imat ka phet na iing ne ioh dei ba ka jah lynti. Ka mat ia dep shato, ngan rah la ka rah sha iing, ngin sa ia peit ynda ka la kyndit bynriew.

(U Donkin u rah ia ka Deiti ha la ksangti bad u mih noh na rynsan).

(Khang ka pyrda)

ACT-II

(Ha kamra thiah ha iing u Donkin. Ka don ka palong, ka shuki, ka miej bad kawei ka itkhmih kaba heh ha kyndong. U Kron u dang pynbeit ia ki jain kup thiah. Wan rung u Donkin uba rah ia ka Deiti ha la kti).

Kron : O, i Bah, phi la wan ? Hangne Bah, Pynthiah hangne. Kato ka um nga la buh lypa, kane ka jain niad. Ei Bah, ngan leit khot syndon ia uto u nongai dawai na Nongkynrem ?

Donkin : Em me, ym donkam, ap shuwa.

Kron : To shim kane ka um, Bah - shim pynniad, synreit.

Donkin : Ap Kron, ap....khmih ! me la ju iohi ia ka jynthaw kum kane ha sla pyrthei ? Khmih, katno ka jingi - lui lui, jingitbiang.

Kron : Kumno kumta Bah ? Ki tymmen ki ju ong te Bah ba haba phi don jingmut iano iano dei ban da kylli pyrthew shuwa ka kur jongno, ka jait jongno, ban lait na ka shongsang shongma. Haleh ioh dei ka kur ka jait lajong ne ?

Donkin - Mano ba ong ia me ba nga don jingmut? Me mut ba nga dei uta u jait briew u ban shu shim kabu ia ka lanot ka kynthai khyannah, ka wanwir wanhap ha kata ka rukom?

(Ka Deiti ka khih bad ud).

Kron : Shish ! Shish Peit Bah i la kyndit bynrrew.

(Ka Deiti ka plie ki kbmata, ka iohi ia ki, ka khie shong pynstet bad kynriah sha kyndong ka jingthiah da ka jingtieng).

Donkin : Kongthai. peit shane, wat leit sheptieng, Phi don hangne ha iing jong nga, ngim shym mut sniew eiei ia phi.

(Ka Deiti ka phet shuh - shuh kham sha kyndong).

Em, em, peit shane .. wat leit leh kumto. Ngin ym pynmong, ngin ym pynmysaw eiei ia phi. Ngi wanrah khnang ia phi hangne ba ngin ioh ban sumar ia phi.

Deiti : Phi....phi....dei u khunbynrrew ?

Donkin : Hooiid kein, nga dei u briew, phi mut nga dei uei ?

Deiti : Phi sah hangne ?

Donkin : Hooïd, kane ka dei ka iing jong nga.

Deiti : Nga dei ka Deiti ...

Donkin : Nga kyrteng u Donkin, khet ia nga Don. Une pat hangne u dei u Kron. O, shisha, Kron..khie leit pyinkhreh ka bam ka dih na ka bynta i Kong-thei i Deiti, khie.

Kron : To Bah.

(Mih noh u Kron).

Donkin : Phin bam hangne bad nga mynta ka miet, mo ?

Deiti : Phi iabam daei ?

Donkin : Da ka ja ka dohkha kein,...balei phi kylli ? Phim sngew bang ?

Deiti : Em, em, nga bang. Ia ka dohkha niulei nga bang bba. Nga ia ioh-mad shisien haba nga leit jngoh ia ki bakha jong nga kiba shong sha jngai bah nangne.

Donkin : Phi mut ban ong ba phi ioh bam dohkha tang shisien ?

Deiti : Hoojd, ngi kiba shong ta sah sha
ryngkew te....bha bok pynban kein
ban ioh mad dohkha kumto shisien
shisien sha um

Donkin : Ngam sngewthuh....

Deiti : Phi dei u briew, phin ym lah ban
sngewthuh. Ynda ngan leit noh
nangne....

Donkin : Phin leit noh nangne ?

Deiti : Hoojd kein, ngam lah te ban sah
shi junom hangne. Nga hap ban
her sha la ka muluk.

Donkin : Ade, kata te ka ban iap.

Deiti : Balei phi ong kumta Bah Don ?

Donkin : Namar ngam kwah ia phi ba phin
leit noh.

Deiti : Phim kwah ba ngan leit noh ? Phi
Phi mut ban ym pyllait shuh ia nga ?

Donkin : Em, em, ym dei kata. Ngam dei
u jait briew uba kum uta, uba brai
ban iuhroit ia ka mon bad jingsngew
kiwei, khamtam ki kynthai ki khynnah,

Deiti : Nga ngeit ba phi long kumta bad
nga sngewtynnad ruh de ia kata.

Donkin : To kein, ale .. hiar noh nangto, phim
don daw eiei ban sheptieng ia nga.



Deiti : Bah Don, nga kwah shuwa ban tip
balei ba phim kwah ba ngan leit
noh nangne ?

Donkin : Phim la sngewthuh katta, Deiti?

Deiti : Em, ngam sngewthuh. Iathuh Bah
Don, Sngewbha iathuh balei ?

Donkin : Ngam tip shuh kumno ngan ong.
Phi i Deiti, nga dang shu ia-
kynduh ia phi bynrei nga johi ha
phi ia kaei kaba u rangbah briew
baroh uba thmu ban pynsyaid ia la
ka rympei u kwah.

Deiti : Balei phi kwah kumta Bah Don ?

Donkin : Kumno Deiti phim sngewthuh haba
katta la shai kdar ka jingmut jong nga?

Deiti : Nga long tang ka jynthaw kaba rit
hakhmat jong phi, ngam sngewthuh
da shisha, Bah Don. Nga tieng ia
phi ki briew, nga tieng.

Donkin : Balei phin tieng ? Hato ngam shym
la wanrah ia phi hangne ha iing jong
nga? Hato ngam shym la sumar ia phi?

Deiti : Hcoid Bah Don kynrad, nga sngewnguh shibun eh ia phi na ka bynta kata.

Donkin : Phi sngewnguh hynrei phim shaniah fat ia nga, ym dei Deiti ?

Deiti : Em Bah Don, kam dei kumta, nga sngewnguh ia pai ...

Donkin : Lada phi shaniah ia nga, to ale hiar na kato ka palong, am ka kti hangne, ale shong hajan jong nga, nga kwah ban iasyllok bad phi.

Deiti : Phin ym pynmynsaw ia nga ?

Donkin : Deiti nga kular ba ngan ym pynmynsaw ia phi..... ale, hiar nangto, am ka kti hangne....

(Ka Deiti, ka ai ka kti ha u bad ka hiar na jingthiah bad ka shong hajan jong u).

Deiti : Phi mut ban ong aiu Bah Don kynrad ?

Donkin : Nyngkong eh nga kwah ban tip phi dei kaei, naei phi wan bad na ka daw aiu ba phi wan poi hangne ha khlaw jong nga ?

Deiti : Bah Don kynrad, nga wan shane ban kyrpad ia ka jingisnei jong phi.

Donkin : Ong Deiti, kaei kaba nga lah ban leh na ka bynta jong phi ?

Deiti : Bah Don, sngewbha iarap lem ia ngi....

Donkin : Ia ngi ?

Deiti : Hooid, ia nga bad ia ki kher ki mer jong nga. Phin iarap ne em ?

Donkin : Ngan shempap shi jingim lada ngam iarap kum ia phi. lathuh ia nga kaei ka khia ka shon, aiu ngan leh na ka bynta jong phi ?

Deiti : Khublei Bah Don, khublei. (Jaw umat) Nga don tang kane ban kyrpad. Sngewbha ban ym pynngat noh ia ki dieng ha ka khlaw jong phi, khamtam ia uto u sebhlei uba don hapdeng khlaw ha ka jaka kaba phi iakynduh ia nga. Phi kular Bah Don, phi kular ba phin ym pom ia uto u dieng ?

Donkin : Kong Deiti, ngam tip balei ki umat rupa ki tuid na ki ngab jong phi kumne bad balei phi kren kumba phi buh mynsiem ha uto u dieng hynrei nga kular ba haba da 'leilei ruh ngan ym pynngat noh ia uto u sebhlei katba ka jingim jong nga ka dang sah.

Deiti : Nga nguh ia phi arti arjat Bah Don,
Ka jingkular jong phi ka la ai jing,
kyrmen pat ia ngi. Khublei, khublei.

Donkin : Nga kular ia phi, hooiid, hynrei ha-
duh mynta ngam pat sngewthuh sha-
phangjong phi. Iathuh hok ia nga Deiti,
phi dei kaei bad hangno ka iing jong
phi ka don ?

Deiti : Kam jngai nangne Bah Don.

Donkin : Lada kam jngai nangne, kumno ngam
ju ithuh ia phi ? O ! ap, ap, nga la
sngewthuh mynta. Phi dei nangtai
na Nongkynrem ym dei bad phi shu
wan shuti shane ? Phi sah shatei sha
sor lehse lane ka lah ban long ba
phi leit pule shabar. Peit shane Deiti,
ngan sa wan kai shatai sha shnong
jong phi, nga kwah eh ban iakynduh
ia ki bahaiing bahasem jong phi.

Deiti : Phin ym lap ia ka jaka sah jong nga.

Donkin : Balei phi ong kumta ? Phi isih ia
nga Deiti, phim kwah ba ngan wan
kai sha iing jong phi ?

Deiti : Em, ym dei kumta. Kumno ngan
isih ia phi haba katne phi la la leh
bha na ka bynta jong ngi. Phi la
sumar ia nga, phi la kular ban ym
pynngat ia ki dieng...phi kular em

Ban Don ban ym pom ia u sehblei
ha khlaw jong phi ?

Donkin : Deiti, sa shisien nga ban biang ba
ngan ym pom ia uto u sehblei, phim
dei ban sheptieng ia kata. To iathuh
kein mynta, nya lah ne em ban ia-
kynduh ia phi katba phi dang sah
shane ?

Deiti : Man ka sngi te em, hynrei ngan wan
kvr pang tang na ka bynta jong phi
man ka miet jong u 'nai khatsaw
synnia. Phi hun ia kata ?

Donkin : Balei tang ha kata ka miet ?

Deiti : Phi hun ne em Bah Don ?

Donkin : Em....nga mut hooid nga hun.

(Wan rung u Kron).

Kron : Bah, Bah, u don uwei u briew uba
wan wad ia phi. U don hangtei ha
surok. U wan da ka kali, u ong
um rung shuh ba la miet.

Dankin : O, la iap artat ! Uei uta mo uba
wan wad ia nga ?

Kron : Tip Bah, ngam ithuh.

Donkin : To peit shane Kron, me la dep pyn-
khreb ka bam ka dih ?

Kron : Hoooid, nga la dep artat, Bah.

Donkin : To kata, Deiti, wat leit sngeweiei ho, shong hangne, shiphang nga la wau, ngin sa ia bam ja ryngkat bad nga.

(Mih u Donkin bad u Kron. Ka Deiti ka ieng noh naba shong. Ka iaid saw-dong ka kamra bad ka khmih bishar ia ki tiar ki tar. Ka jngob ba ka iitkhmih bad ka khmih lyngngoh sha lyndet ka iit. Haba ka iohi ia u synsar uba la pynshaniah ha ki syrdeng, ka kyndit thred bad khynniuh ka met baroh shirynieng. Kynsan - kynsan u synsar u hap sha thian bad ka Deiti ka ran dien suki - suki shaphang ba don ka jinghang).

Deiti : Wow, ani wow ! kane ka jing u khunbynriew kaba shong sang pleng ! Shish eh, kumno ki nud ban' buh synsar kumne hapoh jing. Shempap ia nga....shuh ! ngan leit noh ioh ba wan kem ka sang ia nga.

(Ka Deiti ka lum ia ka sapti jynsur ba la kti bad ka mih bak na kamra. Kham shiphang, u Kron u wang rung hangta).

Kron : Kong Deiti, Kong....O ! shano kum-

to i don ? Shuh ngan leit wad shatai sha kamra shongkai.

(Mih u Kron. Sa shiphang u wan rung biang).

Are ! kumno kumta ? Ha kamra shongkai ruh kam don. Ka don pynban shatai sha kyrpong iing mo ! shuh, ngan leit peit.

(Wan rung u Donkin).

Donkin : Deiti...O ! shano Kron ka leit ?

Kron : Kata kein Bah, nga dang wad ia i. Myntan myntan i dang don hangne....

Donkin : Wad bha me. kan leit shaei...me la peit shatai sha kamra shetja ?

Kron : Hooid Bah, shatai ruh kam don. Ioh ka la phet pynban ne Bah ?

Donkin : Kan phet shano me katta miet. Khie mareh, leit peit shatei sha lynti khlaw, klot !

(Mih u Kron. U Donkin u iaid lynga sharum shaneng bad kren weibriew).

Donkin : Kam don, kam don, kumno kan shu jah kumta kha-ma-kha. Nga lyngngoh ngain phi ia kane ka briew, ka wan naei, kan leit shano, haleh

ka shu iathuh lamler mo ia la ka kirteng ruh? Ka kren ruh da ki ktien ramia kiba ngam sngewthuh satia. Imat ka dei ka riawnsiew aiure mo kaba phet rieh kumne sha khlaw sha biap. Hei! nga kren khleh bieit kumno kumta? Ju don hi ka riawnsiew ka ban kup ia ka dur angel kumto? Em, em, ka Deiti jong nga kam lah da le'lei ban long kaba kumta.

(Wan rung biang u Kron).

Kron: Bah, ngam lap. Ki jong u Bahrit Thwing kiba dang wan phai lum ki ong ba kim shym iakynduh iano iano ruh ha lynti.

Donkin: Kron, hawto iathuh ia nga la nga phohsniew ne nga peit? Iathuh kloi.

Kron: Balei phi kylli kumta?

Donkin: Kane ka dei tang ka jingphohsniew ym dei, Kron? Nga mut ka Deiti kam don shisha, ym dei?

Kron: Tip seh Bah ngan ong kumno. Ynda pyrkbat bha te Bah, imat kane ka kam kaba don eiei sha lyndet.

Donkin: Me mut kumno?

Kron: Nga mut ka bym sngew lah long

kein. Hawto pyrkhat hi maphi seh!
 Ka thei samla aiu phi kata ka ban
 shu mih ramia kumto hapdeng khlaw.
 Ka wan naei lane b dno ruh ym
 tip, ka la jah naduh hynne ruh ym
 don ba wan wad Phi khlem kylli
 ka dei kaei, ka shong ka sah hangno ?

Donkin : Ha ka jingshisha nga la kylli, tang-
 ba ka jubab jong ka kam shai. Nga
 sngew ka ong ba ka sah ym jngai
 nangne.

Kron : Kata ka mut ba ka dei kaba na
 Nongkynrem ?

Donkin : Nga ruh nga mut kumta, na kata ka
 daw nga khlem kylli thikna shuh. Hyn-
 rei kaba lyngngoh ka long ba haba nga
 ong ba ngan sa leit wad ia ka shatei,
 ka ong pynban ba ngan ym lap ia
 ka iing jong ka. Nangta ka pynku-
 lar ia nga ba ngan ym pom ia ki
 dieing ha kane ka khlaw bad me
 tip Kron, ka kular ruh ia nga ba
 kan wan mih tang ha ka por pyllun
 bnai.

Kron : Kein noh katta, kein noh, nga la
 sngewthuh, nga la sngewthuh. .

Donkin ; Sngewthuh ia kaei ?

Kron : Nga la sngewthuh katto, tangba ka

jingeh ka long ioh phim ngeit lane
phi lah ban dom pynban ia nga.

Donkin : Peit shane Kron, kane ka dei ka kam
iap kam im. Lada mem iathuh, ka jing-
bitar jong nga kan long kham arshah.

Kron : Ap shuwa Bah, peit une u synsar
hangne ha madan. Hangne te la ia-
dei....mynta ym dei tang ba nga
la thikna hynrei nga la t p ruh ia ka
daw balei ka phet jyndam kumto.
Phi iohi Bah, kato ka Deiti jong
phi kam dei ka briew.

Donkin : He ! Me ong kumno ? Kam dei ka
briew ? Me kren pynggad ne me
la buaid, Kron ?

Kron : Nga la tip lypa te ba phin ym ngeit.
Sngap shane Bah ngan batai.

Donkin : Em, nga la ngiah ia me, kein noh.
Kam dei ka briew, huh ! Me iohi
ne em ba nga ran ia ka, ba ka thiah
hangne, me tip ne em ba nga bat
ia ki kti jong ka kiba jem koid-
koid ?

Kron : Bah, ngan buh la phi kane ka jing-
kylli kawel. Kiei ki jait jynthaw ki-
ba khein sang eh ia u synsar ?

Donkin : Kiba sang synsar ? Kan don jing-

iadei aiu, kata bad kane ka kam?
 Peit shane Kron, me wat ju kren
 kyllain than. Ia, ngin ia leit wad
 janai ia ka. Khie leit mame shatai
 sha surok, ngan leit ma nga shatai
 sha lynti khlaw. Lada me lap ne
 ym lap ruh, sa wan phai noh kumto
 por hynniew baje eiei, me iohsngew

Kron : Em phi Bah... O ! to, to, ngan leit
 kumba phi ong.

(Mih u Kron. U Donkin u shong
 puson marwei).

(Pynhap ka pyrda).

ACT-III**Scene—I**

(Ha kamra shongkai ha iing u Donkin. Ki don ki shuki, ka miej bad kiwei kiwei ki jingbuh jingsat. U Donkin u iaid lynga-pisa sharum shaneng. Don ba tied jingkhang).

Donkin : Mano kumta ? Rung....

(Rung u Kyrmen).

Are, u Kyrmen ! shano kumne ? Ade, jlang khlem iakynduh shuh la slem bha. Rung mo ong, shong shong.... hangta, kumno, me khlain ong ?

Kyrmen : Lada ngam khlain me mut ngan wan poi shane ?

Donkin : U Kyrmen te u sah u Kyrmen hi mo, khlem kylla. Haba kumne, me wan jngoh ia nga, ne me wan donkam ne me bakla lynti ?

Kyrmen : Mynno me la ju tip ba u Kyrmen u bakla lynti ! Nga wan hangne mynta ruh dei ba nga tip ba ngam bakla.

Donkin : Ym bakla ? Ym bakla aiu ?

Kyrmen : Nga tip ba nga khlem bakla ki jingbishar jong nga. Me iohi Don,

wat la me la leh klet ia ngi ki lok
 ki jor ruh, nga te ngam klet, nga
 tip u Don u leh aiu, u trei kam
 trei jam aiu, u donkam aiu.

Donkin : Nga donkam aiu ?

Kyrmen : Haba nga peit ia ki kam ki jam
 kiba me leh hangne, haba nga la
 khein la diab bad bishar ia ka
 jugbunkam, ka leit ka wan bad ia
 u 'saipan jong me, nga tip mynta
 ba me donkam ia katei kaba nga
 buh harud surok.

Donktn : Kaei kata kaba me buh harud surok ?

Kyrmen : Peit nangto na khalki mo ong, men
 sa shem ba ngam shym kren kai satia.

Donkin : (Jogoh shabar) Kaei kata mo ? Oh !
 ka kali....Ei Kyrmen, me mut ban
 ong ba nga donkam ia katei ?

Kyrmen : Shong shuwa hangto, shong. Ong
 ia nga kane kawei, me nud ban ong
 ba mem donkam ia katei ?

Dankin : Ani ! ka jingnang jong me te mo !

Kyrmen : Em, ynnai ong nga nang ne ngam
 nang, shu iathuh beit me donkam
 ne em ia katei.

Donkin : Ynda ioh pat te me, ym donkam

balei ? Ka jingdonkam te la donkam eh hi kein ban iakren ia kata....

Kyrmen : Ba nga tip ia kata kein me Don ba nga sa wan hangne ruh. Me ioh, nga tip ba kane ka kam kaba me leh ka la nang heh nang jar katba nang mih ki sngi bad ba me donkam la ka kali lajong ban kit ban bah ban leit beh kam kylleng-kylle. g.

Donkin : Kata te ka dei kein me, tangba ka jingeh ka long kane kawei me i ..

Kyrmen : Ia ka jingeh jang me 'lei nga la dep tip lypa, mem donkam ban da iatnuh. Peit shane Don, ka dor katei ka kali ka dang dei hapoh u pud uba me dang lah ban kynjoh. Lada nga sngewthuh ba ka palat na kata ruh, ngam rat da wan tyrwa sha me shane.

Donkin : Kan da dei makna katno katno ruh, hato pyrkhath mame naei ngan ioh pisa.

Kyrmen ; Shisha ? Ngan pyrkhath hi ma nga ?

Donkin : Hawto pyrkhath phi Bah Kyrmen....

Kyrmen : To ynnai pat iakren ia ki jingioh jong me na ki syiar, ki sniang, ka dohkha, u soh bad ki jhur ki jhep

kiba me thung. To, ngin fashim shuwa tang ia kane ka khlaw jong me.

Donkin : To...to....to, kein nob shuwa katta. Peit stane Kyrmen, ka jingmut jong me ka long ba ngan die ia kane ka khlaw ba ngan ioh thied ia katet kali, ym dei ?

Kyrmen : Kata pat kaba shai kdar te Bah Don.

Donkin : Shai te la shai kdar kein me Kyrmen hynrei ka don kawei ka jingeh had kata ka long ba ia myn'a hi, nga don ha ka jingiateh ba ngam lah ban pom wat tang uwei u dieng ruh.

Kyrmen : Kein nob me Don, kum kata ka nia ngam pat ju lap hangno hangno ruh. Me khapnap 'lei ko lih katne katne. Hato, lada me die tang shiphew tylli ki diengbah mem la ioh ban thied ar lai tylli ki kali ?

Donkin : Kyrmen, mem sngewthuh, haba nga la ong ba ym long ban pom wat tang uwei ruh....

Kyrmen : Shuh me ! Ym long ban pom dieng na ka khlaw lajong ? Shu ong beit ba mem don ka mon nga ruh ngan sngewthuh ne ioh dei ba mem kwah

da kitei ki jait kali ?

Donkin : Em, ia ka jingkwah 'lei nga la kwah eh namar nga la donkam sbisha ka kali.

Kyrmen : Te, kaei pat ka jingeh ? Shim noh mynta ioh ba mem ioh shuh kum kine ki jait kali kiba biang eh ban tur ia ka lum ka wah. Lada me sngew artatien, ia ngin ia leit pyrshang niah kai, men sa sngew-thuh hi la nga mut hok ne nga shu bang tang ka na.

Donkin : Ia kata, ngin leit pyrshang. O ! ap shuwa....ia ngin ia leit lang shatai sha Nongkynrem, ngan leit don kam khyndiat. Nangto, ngin sa ia wan biang shane bad me dei ban da bam da dih shuwa, me wan kai teng-teng kumne.

Kyrmen : Ka biang kata, nga ruh nga la sngew thngan bad ym ju dei ban tyngkai ia ka bam ka dih ne me ong kumno.

Donkin : Yn khapnap ia u lok te me ka bha ba ynnai bam shuh hi me ialade ruh.

Kyrmen : Dei kita ki rukom kren kein Bah Don kiba nga ruh nga iahap jingmut. Te, ia kane kali ruh men leh

kumno, shim noh wut-wut, ynnai
artatien shuh.

Donkin : Ngan shu shim noh mynta mynta,
ngan ioh pisa naei ? Sa ia peit kein
me, lehse hadien katto katne bnai
ynda nga la ioh pisa, ngan sa ai
jingtip ia me.

Kyrmen : Shi me Don ! Lada me dang arta-
tien, shim une u shabi, mad hi,
niah hi, men sa ong artat tang u
Kyrmen u lok ba shisha.

Donkin : Ia me, ia leit shuwa, tang mad ym
pat mad, kumno ngan tip ba me dei
u lok ba shisha ne ba kai.

Kyrmen : Ia kata, ia.

(Mih baroh arngut)

(Khang ka pyrda).

★★★

Scene - 2

(Ha kamra shongkai u Donkin. Lah ban iohsngew ia ka jingtiéd ka baje iing bynniew sien. Hadien kata shen-shen wan rung u Kron).

Kron : Ani ! thait hi hop kata ka wad briew, em, kam dei shuh tang ka wad briew, ka la dei ka pynwad briew ia i Bah. Hooïd, wat ma nga ruh nga la kwah naduh mynno ba in don noh la ka nongsumar, hynrei uei u ban poi pyrkhät ba in leit iapmat ia ka briew ka bym dei ka briew. Tangba ... kata ka jingeh, phin leit batai shaphang ki puri ki diaw ia u briew uba la nang la stad kumto, shano un leit ngait !

(Wan rung u Donkin).

Donkin : O, me la da wan ? Me lap ia ka ?

Kron : Lap shano phi Bah. Nga la kylli pyrthew lut katba iakynduh, ym don ba iohi. Phi pat kumno ?

Donkin : Nga ruh kaju. Nga la jlep, nga la ngiah shoin. Shah tharai sniew pynban sa ha ki briew. Nga niulei nga la poi shaduh Nongkynrem te me. Ngam lah peiphang shuh me Kron, balei ka leit long kumne ?

Kron : Nga la ong em Bah hynne ba kam dei ka briew hynrei phim sngap te.

Donkin : To to kata, kam dei ka briew....lada kam dei ka briew, kan dei kaei, hawto iathuh ia nga ?

Kron : Phi kymaw Bah hynne phi ong ba ka kren ki ktien ramia kiba phim lah pei-phang satia ? Phi iathuh ia nga ba ka ong ba phin ym lap satia ia ka iing jong ka, nangta ba ka ong ba kan wan tang ha ka por pyllun bnai. Shisha phi Bah, nga kymaw hynne haba ka shong hangne. nga iohi ba ym don satia ka syrngiew jong ka hangtai ha biar bad ba ka dur jong ka kam shym phalang ne paw ha kato ka iutkhmih kaba don ha kam-ra thiah.

Donkin : Me mut ban ong ba ka dei ka snaiap ?

Kron : Em Bah, kam dei ka snaiap ne ka rngai au-re hynrei ka dei ka puri kein.

Donkin : Ka puri ? Hangne te la kut ki sngi ! Ngam tip shuh ngan rkhie ne ngan iam.....kata ka mut nga la ngat puri me ma nga ?

Kron : Em phi Bah, ym dei ba ngat puri hynrei phi shu iakynduh kein ia ka.

Ka jingiakyndub ruh imat ka long
 ba ka donkam ia phi namar phi
 iathub hana ba ka pynkular ia phi
 ba phin ym pom ia ki dieng ha
 khlaw jong phi.

Donkin : Ade ! kata ka rukom batai jong me
 kaba sngew tieng pynban me.

Kron : Yn tieng lei phi Bah. Ngi ki briew
 ngi dei ki jingthaw ba balor tan
 jong U Blei hangne ha sla pyrthei.
 Ki ksuid ki khrei, ki kynja bym
 long doh baroh ki long hapoh jong
 u briew.

Donkin : Sngew dei hi kata kaba me ong.
 Te, ban ong eh da ka puri he ! Ym
 dei me ba nga tieng — shu sngew
 pher sngew khyllah khait. Kata ka
 mut mynhynne ba me ong kumto
 shaphang u synsar

Kron : Hooïd kein Bah, hooïd. Ki puri ki
 ju khein sang te Bah ia u synsar.
 Nangta, phi ong ym dei Bah ba kam
 sah jngai nangne ?

Donkin : Te bad me te ym lah ialeh mo !
 nga tharai me la tip lypa wat
 ia ka jaka shong jaka sah jong ka ruh.

Kron : Em, ngam tip thikna hynrei nga lah
 ban mutdur.

Donkin : Haba kumta, me pyrkhath hangno kan sah ?

Kron : Em, long kumta kein Bah, nga la ong tan tip thikna te em hynrei nga shu shu sngew ba lada wad ha kato ka jaka na kaba lap nvaṅkong ia ka, nga tharai kan dei shato, ka lah ban long ha krem ha synrang, ha kato ka wahduid ne ha ki maw ki dieng.

Donkin : Ha ki um ki wah te nga ju ioh-sngew ba shait don ki puri hynrei ha ki maw ki dieng.. O ! ap shuwa Kron, hynne ka ong ba haba da lei lei ruh ngan ym pom ia uto u 'sehblei, me kynmaw ia uto u 'sehblei uba mih hangtei hapdeng khlaw ?

Kron : Kata te la dei Bah, ka la dei ka puri dieng bad ka shong ka sah ha uto u 'sehblei, nga la thikna ia kata.

Donkin : Wow ko mei ! kum kane eh ngam pat ju lap ha ka jingim jong nga, em....kum kane kam pat ju jia ha ka jingim jongno jongno ruh, Sngew danda shirukom. ym dei Kron ? Mutdur he, ka Deiti kaba nga dang shu iakyndub, kaba la pynlong ia nga haduh katne kan dei pyaban ka puri ?

Ong Kron, ngan leh shuh kumno mynta ?

Kron : Tip kein Bah, yn leh shuh kumno ?
 Nga ruh nga da kwih eh ba kan
 long ka briew, ba ka doh, kum nga
 kum phi hynrei ki dak ki shin ki
 raw da kumwei te, yn sa ialeh shuh
 kumno ?

Donkin : Em Kron, kam lah ban long. Ka
 Deiti kam dei ka puri, ka dei ka
 briew.

Kron : Phi ong pat kumno kumta. Bah ?

Donkin : (Hylla) Ka Deiti kam dei ka puri ...
 me iohsngew ne em, Kron....ka Deiti
 ka dei ka briew, ka dei ka briew,
 me iohsngew ne em ia nga ?

Kron : Hooid Bah....hooid....

Donkin : Peit shane Kron, ka Deiti ka dei ka
 briew....hynrei ka shukor ia nga.
 Katto la kut, ngam donkam shuh ia ka,
 ngam treh shuh ban iakynduh ia ka,
 me iohsngew ne em Kron ?

Kron : Katba phi ong, Bah.

Donkin : Ani ! ani wow ! ngam long shuh....
 ai um ngan dih....ai ura....

(U Kron u mih pynstet bad khala-
klala u wan phai bad ka um. U
Donkin u dih ia ka um bad tang
shu dep, u shong dem ka knbeh da
ka jingsngew kordit kaba jur).

Khie Kron, leit bam ja noh.

Kron : Phi pat Bah ?

Donkin : Nga ong khie . nga, ngam treh bam ja.

Kron : Shi phi Bah, haduh katta katta eh
te, ym ong phi. Phi leh kumne te
long pynban kumba ngat puri shi-
sha phi wat la ha ka jingpeit jong
nga, dei ka Deiti kaba ngat ha ki tnaw
jong phi ym dei kein ba nga ong
ia kata ban pynrem ia phi hynrei
hawto pyrkhat bha seh, kam dei ka-
ta kaba ong ma nga ?

Donkin : Kein noh Kron, kein noh, me tip
aiu mame ia kaei kaba nga sngew
hapon jong nga ?

Kron : Ia kata ka jingsngew jong phi te
uei u ban tip hynrei kaba kongsan
ka long ka jingleh jong phi kein. Ju
don uta u briew u ban shah ja na
ka bynta ka puri ? Shi phi Bah....
peit shane, ngan leit pynkhreh ja noh
na ka bynta jong phi, ngam treh

ban bam marwei, nga la ong lypa,
ngan khat la ka khat.

Donkin : Me uba saidlah palat. Khie khat me.

Kron : Kumta te hooid seh. Ale noh, ale.

(U Kron u mih noh bad u Donkin
u shong pyrkhat marwei shiphang.
Hadien katto katne khyllipmat u
Donkin ruh u ieng noh joit bad mih
noh nangta).

(Pynhap ka pyrda).

Scene - 3

(Plie ka pyrda).

(Wan rung u Donkin bad u bret ia
ka jaket halor shuki. U Donkin u
shong sbek ha ka shuki heh bad
ring - pyohiar mynsiem kum uba la
thait eh).

Donkin : Uff ! ani, ka jingshit ! Shano uto u
Kron u don ? Kron .. Kron....

Kron : (Na lyndet) Oi Bah !

Donkin : Wan rah um lib shi klat ngan dih.

Kron : (Kham shiphang wan rung u Kron bad
ka umdih) Shim Bih .. (Ap haduh ban
da dep dih). Ai shuh Bah ?

Donkin : Kein noh.

Kron : Phi wan shano Bah phi la syep, la ithait katne katne eh ?

Donkin : Balei me kylli ?

Kron : Em, nga shu kylli kein ba phi la jah naduh hynne mynstep. Peit mynta la 11 baje, ka la dei artat sa ka por bam. Phin bam ja noh, Bah ?

Donkin : Uhuh ! dang bam mame, ngam pat sngewthngan.

Kron : Ei Bah, phi leh kumne te ym long phi. Hynne baroh shistep ruh phi leit wad ia ka, ym dei ?

Donkin : Ia kaei me batai stad mame ?

Kron : Wat ju shukor seh Bah ia nga, nga tip te, nga tang shu peit ia ka dur kbmat jong phi nga la ithuh. Kan myntoi aiu Bah ba phin pynjynjar kai ialade kumne ? Ynda dei tang ka briew ruh dang ia long hi ban ong eiei hynrei yn leh kumno haba phi leit shei khnam pynban sha ka sohpdung lyndet pyrthei ?

Donkin : Shi me Kron, ka puri he ! ka puri ?
Phuit ! balei ka shu wan pynthame kai kumto tang shikhyllipmat ?

Kron : Peit shane Bah, kaba bha eh ka long
ban shu ap ia kata ka sngi pyllun
bnai ta kan wan bad hadien kata
ngin sa ia peit.

Donkin : Nga la bakla me Kron. Ngan da
shu kylli pyrshah ka dei kaei ynda
dei ba nga ban ba kan iathub beit
ia ka jaka sah....pynban nga kum
laplah noh. Tang namar ba ka ong
ba ka sah ym jugai nangne, nga pat
nga la *khet* shim beit ba ka dei na
Non_εkynrem. Sa kawei, kan wan
mih biang baei ruh, nga khlem kyl-
li. Ani! ka jingbe_εit jong nga.

Kron : Nga tharai kan wan ha trai uto u
u sehblei kein Bah, kata lada dei
ba ka shong ka sah ha uto u dieng
lym kumta phi mut kan wan baei
pat?

Donkin : Me tip Kron, lada kan wan biang
sa shisien bad lada ka dei ka puri
kumba me ong, ngan ym pyllait shuh
ia ka, ngan bat jubor ia ka hangne,
ngan ong ia ka ba kan shong duh
noh hangne bad lada donkam wat
ban ia pyndep nam pyndep rukoni
noh khlem buhteng shuh.

Kron : (Rkhie) Phi kren sohsat ne phi biria
Bah?

Donkin : He ! me mut kumno me ong kumta ?

Kron : Phi kein, phi ong myntan ban ia pyndep niam pynden rukom ? Ka niam ka rukom aiu ? Ka niam ka rukom jong ki briew ne jong ki puri ? Ki puri ki ju don niam ?

Donkin : Me te mo, uba pyrkhat jylliew thannga shu kren kai me. Shisha me Kron, ban iakren hi shaphang ka Detti jah ban kylla khlehbieit pyn-ban. Kaba bha eh ka long ban klet noh ia ka.

Kron : Ma phi hi kein Bah uba kynmaw. Nga niulei ngan leh aiu ?

Donkin : Ei Kron, me la thikna ba ka dei ka puri ?

Kron : Nga niulei Bah nga da duwai jur ba kan dei ka briew hynrei phi la iohi hi ia ki sabut kiba pynpaw tyngkrein da kumwel pat, ngan ong shuh kumno !

Donkin : Shu buh lada jia ba nga lap ba ka dei ka briew, ngan leh kumno ia me ?

Kron : Lada jia ba ka dei ka briew, leh katba phi sngewbit ia nga, Bah. Pyniap noh ia nga ruh kam leilei, tang ba ngan tip ba phin ioh ka jingsuk jing-hun ka mynsiem ka biang ia nga.

Donkin : Shuh me haduh katta eh, ym ong me...nga shu ong kein me, shu kyr-men ioh kumno-kumno. Em Kron, leh kumne pyrshang biang sa shi-sien. Me kynmaw ia kito ki dukan shatai sha surok bah? Khie leit, pyrshang kylli sa nangto ioh kumno kumno ki ia tip. Khie....tangba ialeh ban wan kloï ho lih!

Kron : To Bah, to....

(Mih u Kron).

Donkin : Kaba jwat pleng kata ka kam. Lada ka dei ka briew, ha ka jingshisha katto ngi la ia wad, katta la dei ban don la kumno kumno iwei arngut ki ban tip shaphang jong ka. Mynta ka shong satang ha u Kron. Lada um lap, ka mut beit ba ka dei ka puri kumba u ong bad kan bha ba ngan klet noh ia ka, ynnai pynkulmar jingmut shuh ialade. Ngam banse, nga hab ban rai kut noh kumta.

(Don ba tied jingkhong bad pyrta na sha lyndet)-

Nisor : Ko Bah Don, Bah Don....

Donkin : I Bah Nisor ne....O, ale rung. Phi wan beit nangtei na sor?

Nisor : Hooid, nga wan beit shane kein. Te shaphang ka kam jong ngi pat ngin ialeh kumno? Ia phi, kan bha ba ngin ia leit peit biang ia ka khlaw. Peit shane Bah Don, ia ki kseh te ngan siew doi kumto kumba ia iakut mynshuwa mo hynrei ia uto u 'seh-blei ngin ia khein noh da kawei ka dor. Ka biang kumta, em?

Donkin : Ade, kata te la poi haba eh. Bah Nisor, nga mut ban ong lada phim sngeweiei te nga kwah ban pynsa-ngeh shuwa shipor ia kane ka kam ai wai khlaw.

Nisor : Are! kumno kumta shu kynsan-kynsan Bah Don? Ha kato ka sngi phim la kular thik-thik ia nga? Balei Bah Don, don ba khyllie dor shuh-shuh da kaba kham heh nalor ka jong nga?

Donkin : Em, ym dei kata, Phi i Bah Nisor, ka don kawei ka jingjia ha kine ki sngi kaba ktah shibun eh ia nga tangba kaba ngam sngewdei ban ia-thuh ia phi.

Nisor : Kata te phi la shu ai daw phi Bah Don. Phi leh kumne te ngan iap ma nga phi Bah Don. Ha ka jing-shisha nga la ieh lut khait ia ki kam ki jam shawei, ka bai dieng ruh nga

la wanrah. Nangta, ha une u bnai
ban wan *niulei* ym long sei djeng shuh
namar la wan artat u slap. Ka jing-
duh jong nga ka bym kai te Bao,
Don

Donkin : Tip kein, ngan leh kumno ?

Nisor : Em phi Bah Don, pyrkhat bha phi
pyrkhat lem ia nga. Nga lei nga la
shaniah beit ha ka jingong jong phi
namar phi la kular ban aiwai ia ka
khlaw ha nga. Lada ngam ioh pvn
trei, kan ktah ia ka kamai kajth,
ka jingioh jingkot jong nga baron
shisnem.

Donkin : To, da phi ong kumta, ngin ialeh
kumne....ap shiohang un da wan u
Kron. U tang shu wan ngan sa lah
ban ai ia ka rai jong nga.

Nisor : Ngam sngewthuh phi Bah Don....
peit ioh phi mut ban shukor ia nga
te ym long. Pyrkhat seb, ka jingduh
jong nga ka bym kai te.

Donkin : Kata kein Bah Nisor, nga ong ia
phi ap ynda wan u Kron.

Nisor : To, shu buh un da wan bad phi
shem ba ym long ba phin ai wai
ia ka khlaw ha nga, lada ka long
kumta kan myntoi aiu ba ngan ap ?

Haleh phi la ia suh buit lypa bad
u Kron ne?

Donkin : Em, ngan suh buit kumno? Nga la
iathuh ia phi ba ka don ka-
wei ka jingjia.

Nisor : Phi iohi Bah Don, don tang kawei ka
nwa ka jutang balei ba phim lah ban
pom dieng na ka khlaw kaba ma
phi hi phi long trai bad kata ka
long ba don ba khang ia phi ban
leh kumta Ym dei kumta Bah Don?
Dei ne ym dei?

Donkin : Hmm....to, nga tharai phi lah ban
ong kumta.

Nisor : Peit shane, katkum ba tip ma nga,
na iing-na ka liang i mei i pa jong
phi kim tuklar eiei; ha ka jingshi-
ki da kwah hi ruh ban ai wai noh
ia kane ka khlaw jong phi. Na ka
liang ka shnong, ka raid ne wat ka
sorkar ruh, ym don ba khang, nga
mut ym don mano mano ruh ba
khang katkum ba ia tip ne ba paw
shabar.

Donkin : Ka dei kata Bah Nisor. Ym don
ba khang hynrei don ba pynkular
ia nga ba ngam dei ban pom 'dieng:

Nisor : (Rkhie) Kein noh phi Bah Don, phi
uba danda palat. Phi mut ban ong

ba don ki briew kiba nud ban ai
hukum ia phi kumno phi dei ban
leh ia kaei kaei kaba dei hok ka
nongkynti jong phi ?

Donkin : Pynkular, Bah Nisor, don ba pyn-
kular....ym dei ba ai hukum.

Nisor : Bad phi ruh phi kohnguh ?

Donkin : Hoojd, nga kohnguh.

Nisor : Kaei ka daw ?

Donkin : Ban iathuh hok kein Bah Nisor, ia
ka daw ngam tip tbikna hynrei....

Nisor : Hynrei phi kohnguh ? Ade, Bah Don
....kata te, une u briew u la ai jadu
imat ia phi.

Donkin : Al jadu ? Hoojd, nga tharai ka la
ai jadu sbisha phi ia nga.

Nisor : O ! ka dei ka kynthei ? Ka samla,
nga tharai bad lehse kaba bha-
briew ruh de.

Donkin : Hei ! kumno kumta ? Ngam dei ban
iathuh ia phi ia kine kiei kiei.

Nisor : To, to, phi Bah Don. Wa ! phin
lehrain 'lei ia nga ? Kbein ia nga
kum u hymmen, iathuh ia nga
shaphang kata ka theilud kaba la pyn-

kular kumta ia phi.

Donkin : Em phi Bah Nisor, kein noh katto,
 phim dei ban tip shaphang jong ka,
 ym dei ban don mano mano ruh
 ban tip.

Nisor : Phi tip ia nga Bah Don, ngam dei
 uta u jait briew uba kwah ban tu-
 klar ia ka kam kiwei. To, ia ka
 jingkwah jong phi ngan burom, ngan
 ym kylli eiei shuh shaphang jong ka,
 hynrei kawei ngam lah ban sngew-
 thuh - ka don jingiadei aiu kata ka
 jingleit u Kron bad kane ka kam
 ai wai khlaw ?

Donkin : Phin ym sngewthuh Bah Nisor. Peit
 shane. shu shaniah beit ia nga, un
 da wan u Kron. O ! uta imat nga
 sngew u la wan.

(Wan rung u Kron).
 Me iakynduh Kron ?

Kron : Uhuh ! ym don ba tip phi Bah, nga
 la batai bha ia ka dur ka dar, ki
 larkhie pynban ia nga, ki ong....

Donkin : To, to, kein noh, nga la sngewthuh.
 Te Bah Nisor, phi la donbok shi-
 bun ma phi.

Nisor : Kata ka mut ba nga lah ban pyn-
 trei noh ia ka khlaw ?

Donkin : Ka long hi ! phi lah ban sdang noh
ha kano kano ka sngi kaba phi
sngewbit.

Nisor : Phi te uba nang phi Bah Don, phi
la shu pynkyndeh mynsiem kai ia
nga myntan shiphang. Kata ka jing-
jia kaba da sngewlyngngoh palat hyn-
rei to, ngin ia kyrmen hi ba kan
poi sha kaba bha. Te, khublei shi-
bun mo Bah Don.

Donkin : Ban iathuh hok kein Bah Nisor, nga
la khuslai shibun ia kane ka kam.
Ka daw ka long ba nga da kwah
eh ban thied ia kato ka kali na u
Kyrmen.

Nisor : Ka long kumta kein Bah Don, ha
ki jingiadei kam dei jam te, dei ban
buh shuwa ia ka nia ka jutang ha-
lor kiwei kiwei ki jingsngew, ne phi
ong kumno ?

Donkin : Ka dei Bah Nisor. Te nga tharai
ka biang katto... lano phi mut ban
sdang pynngat dieng noh ?

Nisor : Mynta ba ngi la ia beit kumne te,
ngan sdang noh hi kein khlem pyn-
tud shuh.

Donkin : O, ap shuwa ! Ynda phin sdang
pyntrei, pom shuwa ia kito ki dieng
najan kato ka wahduid. Ia kato ka

lynnong khlaw ba don sehblei te pylait
lait shuwa phi, mo Bah. Ia uto u
sehblei *niulei* ym long da leilei ruh
ban pom.

Nisor Kumno kumta phi ong, Bah Don?
Ngam la ong ia phi ba to, ia ki
kseh te ngin iaid da ka dor ba la
iakut hynrei na ka bynta uto u seh-
blei ngan ai tam, arshah laishah,
katba shong ka dor jong u.

Donkin: Em, ia u sehblei te ym long. Lada
phi pom ia u, ngan ym shah ba
phin sei ia ki dieng na khlaw.

Nisor: Kaei ka daw mo Bah Don?

Donkin: Ka don ka daw, tangba nga la ong
ia phi, ngam lah ban iathuh ia kata.
Te phi hun ne em ia kata ka jing-
kwah jong nga?

Nisor: Wa! ym hun balei? Tang ba phi la
ai jingbit ia ki kseh ruh, nga la
sngewnguh shikatdei eh. To, nga
tharai la biang la beit ka kam ba-
roh mo Bah Don? Nga ruh ngan
iaid shuwa ba la miet, mo!

Donkin: To kata, sa leh kumta mo Bah Nisor.

Nisor : To. Nga tharai ha kane ka taiew
 hi ngan wan siew dep ia ka bai
 wai khlaw baroh khnang ha phin
 lah ban leit shim noh ia ka kali
 na u Kyrmen. Nga la iaid ho Bah
 Don, shong suk, thiah suk.

Donkin : To, phi ruh leit suk.

(Pynhap ka pyrda).

ACT-IV

(Ha kamra thiah ha iing u Donkin. U Donkin u syngkhien la ka khlieh halor ki kti bad peitseh ia ka sad katba u dem thiah halor ka palong bad kren weibriew.)

Donkin : Deiti....Deiti, ka lah shisha mo ban long ? Hato ka dei shisha kumba ong u Kron bad ba phi shong sha ka ri kaba sha lyndet kaba ki kjat jong nga kim lah ban bud ? Hato ka lah ban long ba ngan ym iohi shuh ia phi lano lano ruh ? Hato phi dei tang ka rngai ?

O ! O ! mano kumta ? Nga sngew kumba don ba ia kyrbeh shabar. Shuh ! ngan da leit peit....ani wow ! kaei kathie kaba wan mareh shane ? Nga iohi kumba dei ka Deiti. Hooiid, hooiid, ka dei ka Deiti....balei kumthie ? Shuh, ngan leit peit !

Deiti : (Na sha lyndet) Bah Don, Bah Don....

Donkin : Deiti, nga la wan....

Deiti : (Wan rung) Bah Don, Bah Don kynrad....iarap ia nga, iarap....uto u briew u wan beh ia nga, iada ia nga, isynei ia nga, u mut ban pyniap noh ia nga-

Donkin : U briew aiu uta ?

Deiti : Uba buh iain hangne ha kblich, uba sngaid bad jong sniehдох, u rah da ka wait.

Donkin : Uba buh iain ha kblich ?

Deiti : Hooiid.

Donkin : O ! O ! nga la sngewthuh, phi mut uba tap rupia ? Kata te la dei u Bah Nisor. Balei u Bah Nisor un leh khlemakor kumta ? Shuh, da leit, ngan ai jingsneng ia uto u khun ka dusmon

Deiti : Em Bah Don kynrad, ynnai leit, u rah da ka wait.

Donkin : Lada u rah wait, nga ruh ngan rah da ka wait. Ngin sa iapeit uei u ban liem ban lup nyngkong.

Deiti : Ym ju dei ban leh kumta Bah Don.

Donkin : Balei ? Phi mut ngan shu shah ba kin leh bein ia phi ? Na ka bynta jong phi Deiti, ngam salia wat lada ngan iap ruh.

Deiti : Bah Don kynrad, nga sngew shep-tieng her lada phi kren ha kata ka rukom.

Donkin : Sheptieng ? Sheptieng ia nga ?

Deiti : Hooïd Bah Don, nga tieng ba ioh kī kti jong phi kī kylla long ka jing-pynsnewsih bad lehse wat ka jing-iap ia kiwei kī para jynthaw.

Donkin : Phi mut ba ka kti jong nga kan shong tyrut ?

Deiti : Tyrut ? hmm....hooïd, lada phi ju ia ong ba ka long kumta....

Donkin ; Deiti, phim sngewthuh ia ka pyrthei jong ngi. Ka pyrthei jong ngi ka dei ka pyrthei long ka jingleh bor bad jingthombor, ka long ka pyrthei jong ka jingrubroit bad lada phim lah ban long lem kumba long ka pyrthei, yn ym don jaka ia phi ia nga.

Deiti : Bah Don, kam ju long te ka rukom jong ngi ban pynmong pynmynsaw iano iano ruh, khamtam ia kī para jait, para kher para mer. Hooïd, nga ia ju bna ba phi u khunbyn-riew phi ju ia tied ia pduh ia la kī parabriew ; nga ju iohsngew kba-na shaphang kita kī thma ha kaba da kī phew-phew spah kī briew kī ju duh ei ia la ka jingim. Katno ka long kaba sngewshyrkhei. Lada dei ma ngi kum phi, katta ngi ia

duh jait syndon.

Donkin : Kata long kaba dei eh, Deiti hynrei
ka long ruh kaei kaei kaba u briew
um lah ban leh eiei. Baroh shi pyr-
thei ia ka jingsuk ki wad, hynrei
kim foh ia ka

Deiti : Ka jingsuk ? Hooid, hooid....nga sngew-
thuh. Nga kwah ban kyli ia phi
Bah Don, hato phi don ka jingsuk
halade ?

Donkin : Ka jingsuk jong nga ka long tang
bad phi Deiti. Haba nga don ryng-
kat bad phi, ka mynsiem jong nga
ka suk, ka hun, ngam kwah eiei
shuh ba kane ka pyrthei.

Deiti ; Lada baroh ki briew ki don ka jing-
suk halade, yn ym don thma shuh
ha kane ka pyrthei.

Donkin : Kata ka long ka jingshisha, Deiti
hynrei peit shane, mynta nga kwah
ban iakren ia ka jingsuk jong nga
bad jong phi ruh kumjuh.

Deiti : Phi mut kumno ?

Donkin : Nga mut ba ngam kwah shuh ban
long kumne, ngam kwah shuh ba
phin shu jah na nga khlem tip sha-
no phi don, phi leh aiu, phi im

kumno....phi pynsahnud ia nga Deiti
bad katno nga kynjah, nga tmang
kblem ma phi.

Deiti : Bah Don, balei phi kren kumta....balei....

Donkin : Em Deiti, wat leit ong eiei shuh.
Ale hajan jong nga hangne, ale....

Deiti : Em Bah Don, sngewbha wat wan
hajan, wat ktah ia nga.

Donkin : Balei phi ong kumta, Deiti ?

Deiti : Namar ba phi la shukor ia nga:

Donkin : Shukor ia phi ? Mynno ?

Deiti : Phi la pam lut ia ki dieng Bah Don,
ngam tip shuh balei phi leit leh
kumne ia nga, nga....

Donkin : Deiti, wat leit ong kumta, sngap
ngan batai....

Deiti : Phi pynkhein ia ka kular Bah
Don bad shen ngan sa iap ha ki kti
jong phi.

Donkin : Iap ? Phi mut ngan pyniap ia phi ?
Em, ngan pyniap shuwa ialade....phim
tip seh Deiti haduh katno phi long
kaba kordor ia nga ?

Deiti : Te balei Bah Don kynrad, balei ?
Kito ki briew ki mait naphang ia
ki dieng haduh ba nga la triem her.

Donkin : Deiti jong nga, map ia nga. Haba
phi shu jah kynsan-kynsan kumto
bad haba ngam shem shuh ia phi,
ka pynlong ia nga ban pyrkhat ba
kaei kaba la jia hapdeng jong
ngi kam long kaba shisha bad ba
maphi phim don bad baroh ka shu
long tang ka jingchohsniew. Dei na
kata ka daw ba nga sa phah pom
ia ki dieng.

Deiti : Kynrad, ki dieng, ka khlaw ki dei
ki jong phi, nga, ngam don hok ei
ei hynrei nga shu wan tang ban
nguh ban kyrpad kyrpon ia ka
jingisynei jong phi.

Donkin : Wat ju ong kumta. Ka shembha
jong phi ka dei ka mon jong nga.
Bret lut ia ki jingtieng ki jingarta-
tien baroh....ale, ngan kdup ia phi
ha kut shadem.

Deiti : Kdup ? kdup aiu ? kumno ?

Donkin : (Kdup ia ka Deiti) Kumne....Deiti,
peit shane, phi tip ka mut aiu kane?

Deiti : Em, ngam tip, hynrei nga iohsngew

fa ka jingsyaid na phi bad ia ka
jingkyndeh mynsiem ba sngewtynnad
jong phi....hood, ki rukom jong phi u
khunbynriew ki long kiba pher
shisha.

Donkin : Deiti....

Deiti : Bah Don, nga kwah ban kylli na
phi kawei....

Donkin : Kylli Deiti....kaei kaba phi kwah ban
tip ?

Deiti : Bah Don kynrad, phi tip nga dei
kaei ?

Donkin : Hood, nga tip, phi dei i Deiti
jong nga.

Deiti : Em, nga mut phi la tip mo sha-
phang jong nga, nga dei kaei ? Nga
wan naei ? hangno nga shong nga sah ?

Donkin : Nga tip Deiti....hood, nga tip phi
dei kaci hynrei kata baroh kam
pher ha nga.

Deiti : Ko kynrad jong nga, nga long tang
ka jynthaw kaba rit eb, ngam don
hok tang ban kiew ha kane ka iing.

Donkin : Em, em, em....wat ju ong kumta. Nga
kwah ba phin buh jingmut ha lade

ba ha kawei ka sngikane kan long
 ruh ka iing jong phi ha kaba phin
 shong phin sah ryngkat lem tang bad
 nga shilynter jingim.

Deiti : Map ia nga, ko kynrad jong nga. Nga
 don ki jingteh jingkhum, ngam lah
 ban iaid katba mon, ngam lah ban
 leit katba mon. Hooïd, ia ka mon
 jong phi nga kloï ban kohnguh hyn-
 rei tang kat u pud ka jinglah jong
 nga.

Donkin : Balei phi ong kumta, Deiti ? Kaei
 ka ban teh ban khum ia phi lait
 noh tang ka mon jong phi hi.

Deiti : Bah Don kynrad, phi tip nga dei
 kael. Ngam long, ngam lah kum
 phi, ka mariang ka khang ia nga
 bad ngam lah ban iaid tam ia ka
 jylli kaba ker ia nga.

Donkin : Nga sngewthuh. Kata ka mut ngam
 lah ban shong ban sah ryngkat
 bad phi Deiti ?

Deiti : Ngam lah ban don ryngkat bad phi
 shilynter tait hynrei kin don ki aiom
 ha kaba ngan lah ban pynsngewbha
 ia ka mon jong phi, kin don ki por
 ba ngan lah ban long lem long ryng-
 kat ha ktu ha kjat jong phi bad ha
 kum kita ki por; ngan aiti lut ia.

lade ba ka mon jong phi.

Donkin : Deiti, mynsiem jong nga....nga la nang mutdur ba ngin ialong kawei ha ki por baroh, ba ngan ri ngan sumar, ngan kdup ngan da, ngan pynsngewbha pynsuk ia phi kumba long lem kiwei pat hynrei imat nga la dei ban hun tang katba shah ka nusip jong nga.

Deiti : Bah Don kynrad, nga pynsngewsib ia phi ?

Donkin : Em, nga sngewthuh biang biang kumno ka dei ban long. Sngap, ngan kylli na phi ia kane....kumno phi sngew ia nga ? Iathuh ia nga, nga kwah ban iohsngew na ki rymwiang shyntur jong phi hi.

Deiti : Nga sngewtynnad ia phi, nga sngewtynnad ban don ryngkat bad phi, nga....

Donkin : Phi shu sngewtynnad ?

Deiti : Hooiid.

Donkin : Phim ielit ?

Deiti : Ielit ? Ielit kumno ? Kam ju don rukom ba ngi kum kata. Ngi sngewtynnad,

ngi sngewkmen, ngam tip....ieit ka
mut sngewtynnad ?

Donkin : Kumno kumta phim sngewtbuh ?
Peit shane, phi sngew kumno ia nga
hapoh jong phi ? Phi sngew ne em
ia kata ka jingieit ?

Deiti : Hooid....nga sngewtynnad de.

Donkin : Uff ! To, to....ieh ! kein noh katto.

Deiti : Sa hikai ia nga bad ngan sa ieit ia
phi, ngan sngewtynnad ruh de.

Donkin : Hooid, ngan sa hikai, da shisha ngan
hikai.

Deiti : Bah Don nga dei ban leit noh.

Donkin : Phin leit noh ? Em Deiti, phin sa
jah biang na nga. Sngewbha wat
leit, shong noh bad nga hangne.
Peit kane ka iing ngan shna pynbha
ngan pynheh pynitynnad na ka byn-
ta jong phi. Ngin don ryngkat shi
junom.

Deiti : Nga dei ban leit noh, ngam lah ban
sah hangne, nga dei ban beh ia ka
por, nga don ki jingteh jingkhum....

Donkin : Ap, ap....lada phi dei ban leit, ngan
leit buh ia phi.

Deiti : Em kynrad, ngan leit hi, phim lah
ban bud ia nga.

Donkin : Ap shuwa, lano pat ngan iakynduh
ia phi ?

Deiti : Lada phi donkam eh wan khot ia
nga ha trai u sebblei lai sien shi-
sngi-mynstep, mar ia mih ka sngi,
ha ka por shiteng sngi thik lane
janmiet ha mar ba sep ka sngi.
Nga ia leit, shong suk.

Donkin : Ap Deiti....em, em, wat leit.....

(Ka Deiti ka mih la ka mih bad u
Donkin u leit bud nadien bad jngoh
sha lyndet ka rynsan).

Wow mei ! kam don shuh, kumno
kumto ka shu jah rngai ? Pleng !
da kumto mo ka rukom jong ki !

(Don ba tied jingkhang).

Mano ? Rung !

Nisor : (Wanrung) Kumno Bah Don ?

Donkin : Ale, ale Bah Nisor....imat, phi don-
kam ban pynshai ia ki jingleh jong phi.
Shish ! ka la long palat kane ka kam,
ngam sngewtynnad satia. Ba ngan

da dei uba larlar bad uba leh bam-
ja—khluit te Bah Nisor, katta la poi
sha kaba ia umsnam.

Nisor : O, balei kumta kynsan -kynsan Bah
Don ? Nga leh aiu ma nga ? Jia aiu ?

Donkin : To seh Bah Nisor wat len ia kaei
kaba phi la leh Kaei ka jingmut
jong phi ban kthong bad pynher
syngiew ia ka kynthei khynnah
ba khlaw ha biap ?

Nisor ; O ! O ! phi mut ia kato ka samla
myntan ? Shi phi Bah Don, kan shoh
ka khlam ia nga lada ngan leh kum
kata ka kam pohrati. Phi i Bah
Don, nga dang pom dieng ha khlaw
haba ka wan mih kumto kynsan-
kynsan. Nga kyndit thred bad ka
ruh ka kyndit thred ia nga.

Donkin : Te balei pat phi beh ia ka ?

Nisor : Beh ia ka ? Em Bah Don, ngam
shym beh ia ka. Kumba nga la ong,
ka kyndit thred ia nga bad ka her
lailum laiwah khlem kyrtiang dien
shuh. Nga ruh nga shu mareh lang
nadien ban peit shano kan leit.

Donkin : Ka iathuh ia nga ba phi rah da ka
wait.

Nisor : Hooid kein, haba nga dang pom dieng te nga shu khei rah lang kein ka wait ha kti. Hynrei kum kata ka jingmut, ban ong ba ngan ktah kti ia ka kynthei khynnah te ngam don phi.

Donkin : Ka long shisha kumta Bah Nisor ? Peit, ioh phi shu lamler, ioh phi mut ban shim kabu ia ka te, ym long bo.

Nisor : Wa, i Bah Don ! nga niulei, ha ka jingshisha, nga nang mut ba ka dei ka khynnah sor, nga la tharai ba ka ia wan bamkhana shane hynrei ynda nga kylli na kito ki ara, ki ong ym dei namar ki ong kim shym iakynduh briew eiei shuh lait na ka.

Donkin : To, to, nga tharai katto nga la ngeit ia phi.

Nisor : Bah Don, kata ka mut ba ka wan ber beit sha phi shane, ym dei ? Nga ruh nga la dei ban panmap na ka bapli, hangno ka don mypta ?

Donkin : Ka Deiti ? Kam don shuh Bah Nisor, ka la leit.

Nisor : Deiti ? Ade, ka kyrteng kaba sngew-tynnad bha, ka dur kum ka puri blei. Ka sah hangno kane ka Deiti jong phi ? Ka dei kaba na Nongkynrem ?

Donkin : Em phi, kam dei na Nongkynrem tangba wat sngeweiei, ia ka jaka sah jong ka ngam lah ban iathuh.

Nisor : Phim lah ban iathuh ?

Donkin : Em, ym long, sngewbha wat ym pynbor ia nga.

Nisor : To, to, ngam pynbor hynrei nga shu kwah ban kylli tang kane kawei. Bah Don, lada ngam takla, ka dei kane ka Denti kaba pyinkular ia phi ban ym pom dieng, ym dei ?

Donkin : Hooiid....O, shisha ! peit shane Bah Nisor, nga tharai phin ym sngeweiei lada ngin ia sangeh shuwa shipor ia kane ka kam.

Nisor : He ! phi mut kumno ?

Donkin : Nga mut ba mynta ngin hab ban sangeh shuwa ka pom dieng.

Nisor : Ap shuwa ? Phi mut ban ong kum-no kumta ? Ngi la iakut thik-thik Bah Don bad sa kawei pat ngan leh kumno ia kito ki dieng kiba nga la dep pyngat ?

Donkin : Ia kito kiba phi la dep pyngat phi

lah ban pynkit noh. Lada phi sngew duhnong than ruh, to ngan ym shim dor eiei ia ki. Pynkit ei kumto ruh kam leilei.

Nisor : Phi mut shisha kumta Bah Don ?

Donkin : Hooïd, nga mut shisha.

Nisor : Iathuh ia nga kaei ka daw ? Em, ynnai iathuh, nga la sngewthuh myn-ta. Dei namar ka Deiti, ym dei ?

Donkin : Hooïd, dei namar ka Deiti,

Nisor : Hynrei lada phi ai ei ia nga ia ki dieng, phim la duhnong ialade pat ?

Donkin : Ngam sala ia ka duhnong, Bah Nisor. Ha ka jingshisha ngan kham duhnong lada nga ai wai ia ka khlaw ha kum kane ka por, nga ngeit phi sngewthuh ia kata Bah Nisor.

Nisor : Nga sngewthuh Bah Don, hooïd, nga sngewthuh. Lehse, lada nga ruh nga dei uba dang samla kum phi bad lada ka don ka briew kaba kum ka Deiti, nga ruh ngan leh kumjuh bad ka dohnud jong nga kan synshar halor ka khlieh bad ka nia ka jutang jong nga.

Donkin : Nga sngewtynnad ba phi sngewthuh kumta

Nisor : Hynrei nga duhnong pat te Bah Don ialade. Nga dang pom dang khyn-diat tylli ki dieng... phim lah shuh ban pyrkhat da kumwei?

Donkin : Phi la sngewthuh biang biang ia ki jingeh jong nga Bah Nisor. Ia kaba mynta sngewbha ban ym sngew eiei hynrei ha kawei ka por ngan sa lah ban aiwai biang ia kane ka khlaw ha phi lane ngan sa ioh ban siew kyliang pat da kaco kano ka rukom. Ia kaba mynta te map ia nga.

Nisor : To, to, da phi ong kumta. Kata ka mut ia kito ki dieng ngan shu pynkit ei noh kumto khlem da siew eiei ruh?

Donkin : Phim donkam ban siew eiei ia kito ki dieng, Bah Nisor. Khie, pynkit noh marmar bad nga ruh ngan kit bok kit rwang ba ki kam ki jam, ki jingkhieh jingbeng jong phi kin roi shaphrang.

Nisor : To kata, khublei shibun eh Bah Don, khublei, ngin sa iakynduh pat.

Donkin : Tang kawei Bah Nisor, sngewbha

ban ym pur ia kane shano shano
rub, mo !

Nisor : Shuh phi Bah Don, ngan ialap kha-
na shano, kane te kan sah tang ha
ngi kein. Nga la iaiaid kata, mo !

Donkin : To kata, leit suk.

(Khang ka pyrda).



ACT-V

Ha khlaw, U Donkin bad u Kron
ki shong ha ki mawbynna bad u
Donkin u khmied seh sha u sehblei.

Kron : Bah phi la thikna ba ka ong ia phi
ban wan ap ia ka ha une u sehblei ?

Donkin : Nga la thikna bad myntan ha ba
nga leit ban kren hajon jong une u
dieng, ka wan jingbeh lyer kaba jem
jai bad bad ki sla ki khuh khlek
kumba ka jubab ba kan wan da
shisba.

Kron : Peit Bah, ka sngi ka la ieng bha
triang hangtei ha sahit, nga tharai
ka la wan artat kumne. Ngan leit
noh Bah, ngan ap hangtai ha lyndet
lum, lada jia eiei pyrta bad ngan
wan mareh.

Donkin : Kan jia aiu me ? Khie, ka la dei ka
por ba kan wan. Ngan sa khot ia me.

(Mih u Kron. U Donkin u khmied
sba klijar dieng bad ap dngong. Ha-
dien katto katne khyllipmat, ka Deiti
ka wan mih kynsan na lyndet u dieng).

Deiti !

Deiti : Bah Don, khmih kaei kane phi la leh ia ngi ?

Donkin : Balei pat Deiti ? Kaei ka pap ka sang kaba nga la leh ?

Deiti . Hynne dang phvrngab ki briew jong phi ki wan da ka wait u sdie bad peit mynta sa shisien ka juban lak phi la pynkhein. Nga tip mynta ba phim khein ia nga....ngam lah shuh ban rdiang ia ki jingklar jong phi. Mynta ngan leit noh bad ngan ym wanphaj shuh. Khublei, khublei, ngin ym iashem shuh.

Donkin : Deiti, ap shuwa, wat leit, kam dei kumba phi mut.

Deiti : Ngam lah shuh ban iashem bad phi, nga hab ban leit.

Donkin : Deiti, phi la klet mo ia kaei kaba don hapdeng jong ngi ? Phi ong ba phi kwah ban pynsgewbha ia ka mon jong nga, phi kular ba phin long lem long ryngkat bad nga ha ki por ba phi lait bad phi tip ba nga kwah ban ialam noh ia phi ban shong ban sah ryngkat bad nga, ba ngan ri ngan sumar ia phi.

Deiti : Bah Don ia kaei kaba nga ong nga kloï ban bat, nga kloï ban pyndep

hynrei kumno ngan lah ban leh ia
kita lada ma nga bad ki kher ki
mer jong nga ngim lah ban im ban
shong ban sah ha kane ka khlaw
jong phi ?

Donkin : Deiti, ailad ia nga sa shisien ha ngan
siew kyliang na ka bynta ki jing-
leh jong nga baroh.

Deiti : Nga sngewsih Bah Don kynrad, mynta
kam shong shuh ha ka bor ne mon
jong nga. Ka la jia kumne ars'en
arwat, kim shah shuh ia nga ban wan,
nga la shah jop, ki jingiasaid jong
nga ki la kylla long lehnohei. Shong
suk Bah Don, khublei....khublei....

(Ka Deiti ka phai dien bad ia jd sha
lyndet ha u dieng bad ka jah de jak).

Donkin : Deiti, Deiti....balei phim sngap ngan
iathuh ia ka jingshisha. Ym dei ki
briew jong nga kiba wan pom dieng
bynne mynstef....Deiti !

Em kam myntoi, kam wan mih
shuh. Ka briew mrad aiu kaba wan
ia pom dieng nangne ? Kron, ei
Kron....

(Wan mareh u Kron).

Kron : Bah, nga la wan....balei ? jia alu ?

Donkin : Kron, wan hangne kloi ! mano ba pyngat dieng hynne mynstep hangtai ?

Kron : Hangno ? O, tip seh Bah, ngan tip kumno haba baroh shistep nga treikam ha iing. Ioh dei ki jong u Bah Nisor, kein

Donkin : Em me, ia u Bah Nisor niulei nga la ong ba un sangeh shuwa. Nalor kata, hynnin ka miet u la leit phai shatei sha sor, kumno un lap ban wan pom dieng shane dang step phyrngab ?

Kron : Ngan iathuh ia phi kein Bah, ia uto u Bah Nisor ngam itynnad satia, ngam i lah shaniah ia ka jinglong jong u. Sa peit ne, phin da kylli na u lashai lashisngi, un sa ong beit ba u khlem iakynduh ia kito ki ara jong u. Uto u briew uha tang ia ka pisa shitir. Nga lyngngoh kumno um ong eiei ba ka por ba phi phah sangeh pom dieng ?

Donkin : Un ong aiu shuh haba u la ioh ei san tylli ki diengbah, kata, kito kiba u la dep pyngat.

Kron : Pleng ! dei na kata ka daw mo, lym kumta te phi, shano un leit shah ia phi. Uto u jait briew u bym salia te ban leh ia kano kano ruh

bad ngan iathuh ia phi kein Bah, uto u Bah Nisor u kwah eh ia une u sebblei. Sa peit bha ne, sa tang katno un sa wan biang, un pynbe'it ia phi, un khroh ia phi baduh ba phin da ngop shisha.

Donkin : Shi me, me mut nga dei u khyn-nah rit ko lih ba un shu wan pynbieit une utai ? Haba dz lelei ruh ia une u sebblei ngan ym pom lait noh lehse, tang haba nga la thikna ba ym don eiei shuh na ka liang ka Deiti.

Kron : Shisha phi Bah, nga la klet ban kylli, i Deiti pat kumno ? I wan mih ne em ?

Donkin : Katto te men ia Deiti shuh shano ? Ka la wan bad ka la leit ban ym wan phai. Katto ka la kut, ngan ym iohi shuh ia ka. Me tip Kron, ngan ioh ia kito ki dusmon kiba pom ia kine ki dieng, da une ujuh u sde ngan thlieh.

Kron : Phi ong i Deiti im wan shuh ?

Donkin : Ka la sngewrem haduh katta katta, nga la shukor ia ka arsien, kam ngeit shuh ia nga. Nalorkata ruh, ka ong ba kim phah shuh ia ka ba kan wan, ka ong mynta kam hap shuh

ha ka bor ne ka mon jong ka. Ngam lah sngewthuh shuh me Kron.. ynda dei tang ba ka ap ba ngan batai ba ym dei ma nga bad ba don kiba wai ia kane ka khlaw ruh, lehse kan tip ia ka jingshisha.

Kron : Shano phi Bah ! ka puri kan sngewthuh ai u shaphang kata ka ai wai khlaw. Wei la pom ia ki dieng te ka la khein beit ba dei maphi u trai kein uba phah.

Donkin : Em Kron, ka dei ban tip ba ym dei ma nga uba phah. Nga dei ban ioh iakren biang bad ka. Ngan sa wan biang shibit shuwa ben sep ka sngi, ngan khot, ngan khroh haduh ba kan da wan mih. Me ngeit Kron ba kan wan ?

Kron : Tip seh Bah....

Donkin : (Hylla) Me ngeit ne em ?

Kron : Hooiid Bah, hooiid, nga ngeit,

Donkin : Ani ! khun ka pap ! Ia noh Kron, ia ngin ia leit wad jingtip ia kito kiba mut ban dusmon ia ka Deiti jong nga bad nga tang shu lap, me Kron, ngam salia wat ban dihsnam im ruh.

Kron: Nga ruh Bah, nga ruh.

(Mih u Donkin bad u Kron).

(Khang ka pyrda).

★★★

SCENE-2

(Plie ka pyrda).

Ha kblaw. Rung u Donkin. U shong ha u mawbynna bad u peitseh ia u sehblei.

Donkin : (kren weibriew) Deiti ! peit ia nga hangne, sngap ia nga. Khmih hangne nga don bad nga ap ia phi. Phi tip ba nga khlem shukor ia phi hynrei ia nga wan ap hangne man ka sngi, ka long lehnohei ia nga. Phi iohsngew ne em Deiti ia nga ? Lada phi iohsngew, wan mih. Mano ba khang ia phi ? Khmih, mynhynin ka miet u 'nai khatsaw synnia ruh phim shym wan mih satia. Ngan leh kumno Deiti ba ngan pynsngewbha ia phi ? Ngan leh kumno ba ngan pynlong ia phi ba phin ngeit bad shaniah biang ia nga sa shisiën ?

Uhuh ! jar jar - kam shah shkor
ia nga Ngan leh kumno ? Em, kein
noh katto, kane baroh ka long tang
ka jingphohsniew, ...em, em kumno
kumta nga kren ? Ka Deiti kam dei
ka jingphohsniew, ka Deiti ka don
shisha bad ngam lah ban im khlem
ma ka.

(Wan rung u Kron)

Kron : Bah Don, phi hangne pleng mo ! nga
la wad ia phi kylleng kylleng. Ei Bah,
phi wan man ka sngi shane ha kane
ka rukom te ym long phi. Lada ka
don ka jingthmu ban wan te, ka la
dei ban wan hynnin ka miet kein
ba pyllun bnai kumto.

Donkin : Ngan ap haduh ba kan da wan.
Kan sa wan te me Kron ha kawei
ka sngi, me ngeit ne em ia nga ?

Kron : Em Bah, ngam ngeit. Peit shane
Bah, kam myntoi ba phin duh thiah
duh dem tang na ka bynta ka ngai
aiu-re. Ngeit ia nga Bah, ka Deiti
kam wan shuh bad phi ruh phi dei
ban klet noh ia ka. Shim kabu ia
kane ka jingbym wan jong ka da
kaba kyndit bynriew noh sha ka
pyrthei lajong. Wa ! kat kane ka
jingbun thapbalieh bun rong ! Leit
shatei sha sor seh, katno ki puri

phin lah ? Kiba lieh, kiba jong, kiba stem ruh kito....jied kein katba phi mon.

Donkin : Me mut ngam tip ia kata ? Me mut ka long kaba suk ban pynlip ia kane ka ding kaba klang hapoh jong nga ? Dang suk kaba pynlip ia u lum mihding tang shi khra ka um le me Kron.

Kron : Shi phi Bah, phi da kren haduh katta katta. lathuh ia nga kaci ka ban shan hakmat ka mon bajwat ?

Donkin : Kron, me dang khvnnah, mem pat sngewthuh, mem pat mad aiu ka mut, aiu ka long ban ngat ha kum kane ka apot.

Kron : To, lada phi ong kumta. Hynrei ha ba kam don, kam wan mih shuh, phin leh kumno ? Wat ia ka briew kaba phi lah ban iakynduh, ban pynsngewthuh, ban byrngem, ban khroh, ban pynbieit ruh haba kam mon hi, eh tiaw em Bah ban pynkohnguh ?

Donkin Hmm....ynda pyrkhat bha, shirukom sngew dei hi kaba ong mame. Hood Kron, ynda pyrkhat bha ka dei, ka dei....kaba bha eh ka long ban klet noh ia ka. Tangba kane kawei, me

tip Kron, lada nga ioh kano kano ka buit ne lad khatduh ha kine ki sngi, ngan leh beit - ngan pyrshang shi sien pyrshang mat duh mat ioh ia ka.

Kron Kumta te sngewtynnad seh. Leh ia kiei kiei kum u rangbah, im shisien iap shisien.

Donkin : Ka dei me Kron, naduh mynta ngan long u kynrad halor lade. Ym dei ban don shuh mano mano ban pyn-iaid ia ka jingim jong nga, ia kaba nga sngew dei ban leh, ngan leh beit. Naduh mynta yn ym don shuh mano-mano ban khang ne bin buh kyndon ia kaei kaba nga dei ban leh kaei kaba ngam dei ban leh.

Kron : Dei kata ka mynsiem kein Bah kaba jop ia ka pyrtnei. Pynieng la ka khlieh bad wat ju pynliem 'niuhamat.

Donkin : To kein noh katto. Mynta ngan kheinduh lut, long katba long, jia katba jia, ngam salia shuh.

Kron : Em phi Bah, phi poi shano pat kumta ? Ka jingkheinduh ka mut haba leh ia kano kano ha bym don lad shuh hynrei kaba leh da ka nia ka jutang, da kaba khein bad bishar bniah bad da ka mon rangbah ka iapher shibun.

Donkin : Nga ong ia me kein noh...ha nga mynta ka kheinduh bad ka mon rangbah kam pher eiei shuh.

Kron : To, katba phi ong. Ngin ia leit noh, Bah ?

Donkin : Khie dang leit mame, ngan ap hangne haduh ba nga da iakynduh ia ka Deiti.

Kron : Jia aju pat Bah ia kata ka mon bajwat jong phi ? Shano kata ka mynsiem rangbah kaba ngi iakren myntan ?

Donkin : Me sngewtbuh aju mame ? Khie leit, nga ong.

Kron : Ap shuwa Bah, haw peit utei uba wan shane, um dei u Bah Nisor ?

Donkin : O, la iap ! u kwah aju pat ?

Kron : Nga tip u kwah aju....u kwah ia une u sehblei.

Donkin : U sehblei ? Haba da leilei ruh ngam ai. To ieh, nga la tip ma nga. Khie mame, leit mareh sha iing shiphang, wan rah kwai bad umdih bad wan noh bak-bak, sngew !

Kron : To Bah.

(Mih u Kron, wan rung u Nisor)

Nisor : Ko Bah Don, phi hangne mo pleng!
nga lu wan wad ia phi sha iing
hynrei ym don bried....

Donkin : Phi kwah aiu pat ?

Nisor : Wat sngeweiei ho Bah Don, ym dei
ba nga lorni khnang hynrei ka shu
wan ka jingmut ha nga shaphang
kato ka Deiti jong phi bad kum u
paralok nga sngew ba nga dei ban
iathuh lem ia phi ia kaei kaba nga
suba shaphang jong ka.

Donkin : Suba ? Suba aiu ?

Nisor : Phi tip Bah Don, kato ka Deiti jong
phi imat....nga tip phin lyngngoh lada
ngan iathuh ia phi ka dei kaei.

Nisor . Lyngngoh ? Em ngan ym lyngngoh,
phi iohi Boh Nisor, nga ruh nga
tip te ka dei kaei ?

Nisor - Phi tip ?

Donkin : Hooiid, nga tip. Nga tip ruh ba ka
shong ka sah ha une u sehblei uba
don hakbmat jong ngi bad ngan ia-
thuh ia phi kawei....ba ha kawei ka
sngi nga don ka jingkyrmen ba ngan
ioh ialam ia ka sha la iing ba kan
shong kan sah ryngkat tang bad nga
shirta jingim.

Nisor : Ka long shisha kumta Bah Don ?

Donkin : Hooïd, hynrei phim sngewthuh ia nga, phi pom ia ki dieng haba nga la ong ynnai pom dieng shuh bad dei na kata ka daw ba kam wan mih shuh.

Nisor : Nga panmap na phi namar kata, Bah Don. Ka jingshisha ka long ba nga khlem ioh iakynduh shuh ia kito ki ara jong nga ha kato ka miet bad kim tip satia ba ym dei shuh ban pom dieng.

Dongin : Ki jingbatai jong phi ki la dier palat. Phi la dep pynthut ia ka bad na ka daw jong phi, nga la duh ia ka. Nga la shukor ia ka arsien bad mynta kam ngeit shuh ia nga.

Nisor : Bah Don, myntan phi ong ba phi kwah ban ialam ia ka sha iing, ym dei? Wat ym shim ba nga tuklar bym dei mo Bah Don hynrei phi i, lada phin ialam ia ka sha iing, phi donkam ong ban pynheh bad shna pynbha ia ka iing khnang ba kan biang ka jingsah jong ka?

Donkin : Phi mut ban ong kumno?

Nisor : Nga mut kumta kumba nga ong. Lada phi kwah ban pynshong pynsah ia ka ha ka iing kaba kham bha, kham kylluid, kham suk, phi

donkam ban lut tyngka, ym dei
Bah Don ? Nalorkata, sbaphang kato
ka kali na u Kyrmen ruh lehse,
phin donkam hi wei shisien ba phi
la don la ka briew.

Donkin : Phi mut ban ong aiu Bah Nisor ?

Nisor : Kata kein, na ka bynta kita baroh,
phi hab ban lut tyngka bad naei
phin ioh ia ia kata ka tyugka lym-
da phi die noh ia kine ki dieng.

Donkin : Kan myntoi aiu shuh phi Bah Nisor.
Phi iohi, kumba long mynta, ka Deiti
kam wan shuh....

Nisor : Phi tip balei kam wan mih shuh ?

Donkin : Hood....dei namar ba phi la pyn-
thut ia ka.

Nisor : Em, ym dei kata. Phi ong ba ka
shong ka sah ha une u sebblei hynrei
to iathuh ia nga, lada phi pom noh
ia une u dieng, phi tharai hangno
pat kan shong kan sah ?

Donkin : Hangno ?

Nisor : Wa, ine i Bah Don te mo ! Lada
phi pom noh ia une u dieng kan
ym don jaka shuh kein ba kan sah
bad dei hangta ba kan sa wan sha
phi bad phi ruh phin ioh ialam
ia ka sha ling ba kan shongduh
bad phi Em, ym dei ba nga

kren tang ban lait jynhaw. Pyrkhat bi maphi kein, ka shongnia ne em kata ka jingong jong nga ?

Donkin : Ka lah ban long Bah Nisor, kaba sngew dei kata ka jingong jong phi.

Nisor : Te, ngam la ong ? Shi maw artylli ki sim, phi pyrkhat kumno ?

Donkin : Ka dei Bah Nisor, ka dei. Balei ngam pyrkhat ia kata naduh mynshuwa ?

Nisor : Lada phi sngew kumta, kaei pat ka jingeh ? Pom noh ia uto u sehblei bad ngeit ia nga, khlem pep kan sa wan shong wan sah noh bad phi Phi dang artatien ne ?

Donkin : Em, ngam artatien shnh. Mynta nga dei u riew kheinduh ngan leh kumba phi ong.

Nisor : Kumta te hooid seh. Shuh ngan leit shim u sdie nangtai.

(Mih u Nisor)

Donkin : Nga lyngngoh ia une u Bah Nisor. Balei u wanrah sdie shane haba ngam shym shah shuh ia u ban pom dieng ? Sngap ! balei ka lyer ka beh kynsan kumne ? Imat dei ka Deiti bad bad ka mut ban wan mih....

Deiti ! Deiti ! lada phi mut ban wan ale, nga ap ia phi hangoe. Peit mynta la katno sngi shuh ba nga ap ia jingwan jong phi hynrei phim pataw, phim wan mih. Lada phim pynsngew ia nga mynta, ngam banse ban leh ia kaei kaba nga sngew dei bau leh. Phi iohsngew ne em Deiti ? Phi iohsngew ? Uhuh ! jarjar, kam pynsngew satia. Kein noh katto, mynta ngan leh katba ong u Bah Nisor.

(Wan rung biang u Nisor.

Nisor : Shim Bah Don une u sdie, shim pam ia uto u dieng bad sa peit kan jia aiu?

Donkin : Ap shuwa....Deiti, wan seh kane ka dei ka sien ba khatduh, wan, ngan ym shukor shuh ia phi.

Nisor : Bah Don, phi khot ia ka kumta, phi tharai kan iohsngew ia phi ? Em....ka Deiti jong phi ka don sha kawei pat ka pyrthei bad kan ym wan mih shuh lynda phi pom shuwa ia une u dieng

Donkin : Bah Nisor, ngam tip balei ? hynrei nga sngew phieng ka khlieh, nga tieng ioh jia kaei kaei kaba sniew.

Nisor : Kaei pat ka ban jia ? Sa iaei pat

phi dang tieng ? Shim une u sdie,
pom....ne ngan pom ma nga ne ?

Donkin : Em phi....kat kane kane ka sat, am
hangne, ngan pom hi.

(U Donkin u shim ia u sdie bad u
sdang ban pom. U am hi thop
bad ka nur ha u sehblei ka la nang
heh).

Bah Nisor, kumno katta ruh kam
mih satia ?

Nisor : Phi hab ban pom haduh u dohnud iong
u dieng lane haduh ba un da khyll-
lem syndon bad dei hangta ba kan sa
mih shabar.

Donkin : To, lada phi ong kumta....

(U Donkin u pom biang bad ha-
dien katto katne por u phai sha u
Nisor)

Bah Nisor, nga la jan poj haduh u
dohnud....

Nisor : Ka bha kein....pom shuh Bah Don,
pom... khyrwit tynggeh.

(U Donkin u pom tynggeh bad kynsan-
kynsan ki iohsngew ia ka jinglynniar
khang ka Deiti bad ha kajuha ka por

u Kron u wan rung).

Kron : Kaei kata kaba lynnian ? Bah, ieh wat pom ! balei phi leh bieit kumto ?

Donkin : Bah Nisor, Kron, sngap kata ka Deiti....balei ka lynnian sngew ngiew kumta ?

Kron : Peit Bah, peit...peit ha kato ka nur ba pom ma phi ! Khmih ka snam ka mih na uto u dieng.

Donkin : Wow ko mei, ka snam ! Ka snam aiu kane ?

Kron : Ka snam jong i Deiti....peit Bah, i Deiti i la wan mih na une u dieng.... khmih ka dur khmat jong i ka la lieh bler bad peit, katno ka jingkor-dit jong i....

(Ka Deiti ka wan mih hakhmat hakhmat u dieng da ka khmat kaba shoh tlot ngai-ngai bad ka khap-brip ngaih-ngain ki khmat. Ka don ka dak pruid na sbiliang sha sbiliang ka sapti jong ka hamar kpoh kaba tud da ka snam rynieng).

Deiti : (Ud) Bah Don kynrad, balei....phi ... phi leh....bein kumne ia nga ? Mynta ngan....iap ha....ha ki kti... jong phi....

Donkin : (Lynnian) Deiti !

(Ka Deiti ka sdang ban kyllon hyl-
lon hynrei u Donkin u kynrup bad
shim ia ka thrait ha lade)

Donkin : Wo ko Blei ! Deiti, map ia nga,
kaei kane nga la leh ia phi ?

Deiti : Shong suk Bah Don....ki kher ki...
mer...jong nga....ki....la wan....shaw....
ia....ia....nga khublei....khublei....

Donkin : Em Deiti, wat leit ong kumta, ngin
leit rah ia phi ba phin ieh ka jing-
sumar, phin jem, phin koit noh,
ngeit ia nga ale Kron, ale, ngin leit
rah ia i Deiti...

(U Donkin u rah ia ka Deiti bad
mih noh na ryndan).

Kron : Yn phah sumar ? Yn phah sumar
shaei ? Kat ban da poi shatei sha
Sor, la lap ba khlad sa ka bapli.
Em ban ieh ia i Bah ha kum kane
ka apot pat ruh ym dei, shuh, ngan
leit bud lang nadien....

Nisor : Ia, ia Kron, ngin ia leit iarap ia i
Bah Don...

Kron : Phi wan batai stad aiu maphi ? Lym-
da dei na ka daw jong phi kane

baroh kan ym jia .. dei tang na ka
daw ba phi rhah tyngka palat. phi
wan pynshoi ia i Bah ba in leh ia
kane ka kam tyrut.

Nisor : To seh Bah Kron. phi shu wan
kynnoh kumta te leit dei mo....

Kron : Balei ym dei ? Phi mut ban len ?
Phi tharai ngam tip ?

Nisor : To seh, long jai jai ---

Kron : Long jai jai ? La phlei katne ka snam
ruh phi dang nud phngar hi ban ong
long jai jai.

Donkin : (Na sha lyndet rynsan) Kron ! Kron !

Kron : Sngap shata, halei pat Bah ?
(Wan mih u Donkin sha rynsan bad
u rah tang ia ka sapti ka Deiti ka
ba la pynsiang ha ki ksangti jong u
baroh artylli).

Kron : Bah, balei phi wanrah ia ka sapti
i Deiti shane ? Shano phi buh ia i ?

Donkin : Wat ju kren khlehbieit Kron, mem
tip ba ka Deiti ka la leit phai sha
la ka jong ka muluk, sha ki kher
ki mer jong ka ? Peit kane ka sapti,
hawto kam dei ka sakhi ?

Kron : Ka sakhi ia kaei Bah ?

Donkin : Ka sakhi ba kam dei jong kane ka pyrthei jong ngi kaba tang na sla
Ka sapti, ki jain ba ngi phong hato
kim dei kiba tang na sla, Kron ?
Ka Deiti kam dei jong ka pyrthei
bynrei ka dei joug ka mariang ka
wan na ki thymmei ba synlar jong
ka mei mariang kiba dap da ka
jingim bad ki ain kiba ryntih, kam
lah shan bakhmat ki jingleh thombor
u khunbynriew.

Kron : Kata ka mut ba i Deiti i la iap,
in ym wan phai shuh ?

Donkin : Hooiid, i Deiti i la iap ha ngi. . in
ym wan phai shuh.

(U Donkin u pynthiah ia ka sapti ha
tra i u dieng).

Nisor : Em, phi bakla, ka Deiti kam pat
iap....ki puri kim ju iap. Ngeit ia
nga, kan sa wan.

Donkin : Em, kan ym wan shuh.

Nisor : Kan wan Bah Don, tangba phi dei
ban pynkhylllem shuwa ia une u
dieng.

Donkin ; Phim sngewthuh Bah Nisor. Ym lah

shuh ban pom ia une. Une um dei
u dieng, une u dei ka Deiti.:

Nisor : Phi kren kumei kumta ? Kumno u
ne u dieng un dei ka Deiti ? Am
uto u sdie hangne, lada phim treh
pom, ngan pom hi ma nga.

Kron : Ka dei kaba ong i Bah, une u dieng
... em, kane ka dieng ka dei i Deiti.
Khmiib k'tei ki sla ki i kumba ki
la iap stai kynsan kynsan, khmiib ka
rong kane ka dieng ka la ka kylla
blad kumba kam don snam shuh....

Nisor : Lada kane ka dieng ka dei shisha
ka Deiti kumba phi ong bad lada
ka dang ieng hangne, phi pyrkhat
kumno kan lah tan wan sha ling
jong phi lasyit. Pom noh ia ka,
mysiem ka Deiti na kane ka dieng
pyllait noh ia ka bad haba kam
don jaka shuh ban sah kan sa wan
her sha phi.

Kron : Yn leh kumno Bah ?

Donkin : Ka kam jong ngi hangne la dep,
Kron. Ale, ngin ia leit noh bad
phi Bah Nisor phi lah ban leh katkum
ba shah ka jingsngewthuh jong phi.

Nisor : To kata, shuh, shuh sharud, ai ngan
pynkbyllem hi ma nga.

(U Nisor u shim ia u sdie bad sdang ban iaid shajan u dieng. U Donkiu bad u Kron ki mut ban mih noh hynrei haba ki iohsngew ia u Nisor ba u pom ia u dieng, ki ieng noh hatduh rynsan).

Donkin : Kron, utai u Nisor u leh kumba u dei u trai ka pyrthei mariang. U leh kumba u kham tip ma u shaphang ka Deiti bad u pynbor ia nga ban pom ia u dieng, ngan pyniap noh ia u shisyndon.

Kron : Em phi Bah, ynnai phi, kein noh.... ym ju dei ban leh kumta. Un sa ioh hi ia ka ba bainong ha kawei ka sngi.

Donkin : Khmih ba u pom ia utai u dieng.... em, ngam shah.

Kron : Yn leh aiu phi Bah, uto u dieng u long tang ka dak bad mynta ba ym don shuh ka Deiti, ai un mat pom, ioh pisa ei khyndiat khyngoit.

Donkin : Em, ka long kumba die ia ka snam bad pynlehnhei ia ka jingiap ka Deiti, Em, ngam shah, khje leit ong ia u ba un kein noh shisyndon.

(Katba ki dang iakren, ka pyrda ka khang suki-suki bad u Donkin bad

u Kron ki don hakhmat duh ka rynsan shabar ka pyrda).

Kynsan-kynsan, iohsngew na sha lynet ka pyrda ia ka jingud u dieng bad ka jingsawa jrain haba u dieng u hap bad bud sa ka jinglynniar ba shyrkhei u Nisor).

Donkin : Balei kumta Kron ?

(U Kron u khyllie khyndiat ka pyrda bad u jngoh. Nangta u phai biang sha u paidbah bad tap ia ka khmat da ka jingsngewtriem her).

Balei ' Jia aiu Kron ' Shuh, shuh ...

Kron : Ani wow Bah ! wat leit peit, wat leit peit ani ! shyrkhei rem. U dieng u la khyllen, u la ban ia u Bah Nisor, u la pra, u la lwet la lyko hi phom,

Donkin : Kaei kane eh kaba la jia ? Ngan ym klet shuh ia kane Kron ...

Kron : Phi dei ban klet. Kane ka dei tang ka jingphohsniew, ka jingim jong phi ka dei kaba shisha bad ka don shakhmat. Kin don kiwei pat ki por, kiwei pat ki kabu bad lehse, kiwei pat ki Deiti. Ka jingiap u Nisor ruh kam shym dei ka popjong

phi. U kwah palat ia u sehblei,
pynban ioh kylla u sehblei ia u.
Ale noh Bah, ia ngin ia leit phai
noh sha la iing.

Donkin : (Phai shadien) Deiti, map ia nga,
ia ki jingbym pyrkhat jong nga, ia
ki jingduna jong nga baroh bad to
leit suk. Ngan da poi sha lyndet
pyrthei lehse ngan sa iashem biang
bad phi. Khublei, khublei.

(Mih baroh arngut na rynsan).

LA KUT



Ki Kot da u juh u nongthoh

1. Ka Premmiet Khatduh (1987)
 2. La Phon Ka Kper Tyrso (1988)
 3. Ka Melody (1989, 1991, 1994, 1998)
 4. Ki Sur Ka Synnia (1989)
 5. Ka Jingai Sngewbha (1989)
 6. Ka Thapbalieh bad kiwei de ki khana
 7. Shano ngan her (Photo story)
 8. Ka Puri Dieng (1999).
-

Ka Jingsngewnguh

Ba kyrpang

IA

I DR. B. L. Swer,

Bah R. S. Lyngdoh,

Bah J. Myrthong

Bah V. Kordor Lyngdoh Nongbri.

*“ This book is published with financial assistance
from State Government of Meghalaya ”*